


陝西通志



第七十九卷

紀事四

周至唐

DS  
793  
S45S5  
1735  
V.79







陝西通志第七十九卷

紀事四

**周**

明帝二年夏六月帝如昆明池秋九月帝如同州

六月辛未幸昆明池九月丁未幸同州過故宅賦詩十月辛酉還

宮

周書明  
帝紀

武成元年延州稽胡叛擊破之

高琳武成初除延州刺史從柱國盧豆寧討稽胡郝阿保劉桑德

等破之

周書高  
琳傳

武帝保定元年丹綏銀州作亂討平之

是年丹州綏州銀州部內與蒲川賊同反以達奚震辛威討平之

延綏  
鎮志



冬十一月帝如岐陽

十一月丁巳狩於岐陽十二月壬午至自岐陽

周書武帝紀

二年春閏正月洛州民謀亂伏誅

洛州民周共妖言惑眾假署將相事發伏誅

周書武帝紀

冬十月治兵

十月辛亥帝御大武殿大射公卿列將皆會戊午講武於少陵原

周書武帝紀○按咸寧志少陵原在今縣南四十里

三年秋九月帝如同州

九月丙戌幸同州十有二月辛卯至自同州

周書武帝紀

四年冬十月帝如沙苑

十月丁卯幸沙苑勞師癸酉還宮

周書武帝紀

年春二月帝如岐州



二月壬申行幸岐州

周書武帝紀

天和元年秋七月築屯兵列城冬十一月如新城

七月戊寅築武功鄱斜谷武都留谷津坑諸城以置軍人十一月

丙戌行幸武功等新城十二月庚申還宮

周書武帝紀

二年延州賊作亂于實率衆討平之

天和二年延州蒲川賊郝三郎等反遣實率衆討平之斬三郎首

獲雜畜萬餘頭乃除延州刺史

周書于謹傳附

三年二月帝如武功夏五月帝如醴泉宮冬十月治兵十一月帝如

岐陽

二月丁卯幸武功丁亥還宮五月庚申行幸醴泉宮秋七月戊午

至自醴泉宮十月丁亥上親率六軍講武於城南京邑觀者輿馬

彌漫數十里諸蕃使咸在焉十一月甲辰行幸岐陽十二月丁丑



至自岐陽周書武帝紀

四年夏五月帝如醴泉宮

五月庚戌行幸醴泉宮七月辛亥至自醴泉宮周書武帝紀

五年夏四月帝如醴泉宮

四月甲寅行幸醴泉宮七月乙卯至自醴泉宮周書武帝紀

冬十二月齊遣兵寇邊置防守

齊將斛律明月寇邊於汾北築城自華谷至於龍門周書武帝紀

六年秋九月築塞上列城五

稽胡數為寇亂使榮綬集之榮於上郡延安築周昌弘信廣安招

遠咸寧等五城以遏其要路稽胡由是不能為寇隋書郭榮傳

冬十月治兵十一月帝如散關

十月壬寅上親率六軍講武於城南十一月丁巳行幸散關十二



月己丑還宮

周書武帝紀

建德元年冬十一月治兵十二月帝如斜谷

十一月丙午上親率六軍講武於城南庚戌行幸羗橋集京城以東諸軍都督以上頒賜有差乙卯還宮十二月壬申行幸斜谷集京城以西諸軍都督以上頒賜有差丙戌還宮

周書武帝紀

二年春二月詔皇太子贊撫巡西土

二月甲寅詔皇太子贊撫巡西土三月己卯皇太子於岐州獲二

白鹿以獻詔答曰在德不在瑞

周書武帝紀

冬十一月治兵

十一月辛巳帝親率六軍講武於城東癸未集諸軍都督以上五十人於道會苑大射帝親臨射宮大備軍容

周書武帝紀

三年春二月帝如雲陽宮



二月乙卯行幸雲陽宮三月辛酉至自雲陽宮

周書武帝紀

秋七月帝如雲陽宮衛王直舉兵反司武尉遲運拒討之敗走

七月庚申行幸雲陽宮乙酉衛王直在京師舉兵反欲突入肅章

門司武尉遲運等拒守直敗率百餘騎遁走戊子至自雲陽宮

周書

武帝紀帝幸雲陽令運以本官兼司武與長孫覽輔太子居守俄而

衛刺王直作亂率其黨襲肅章門覽懼走行在所運時偶在門中

直兵奄至不暇命左右乃手自闔門直黨與運爭門斫傷運手指

僅而得閉直既不得入乃縱火燒門運懼火盡直黨得進乃取宮

中材木及牀等以益火更以膏油灌之火勢轉熾直不得進乃退

運率留守兵因其退以擊之直大敗而走

尉遲運傳

八月帝如雲陽宮九月如同州

八月丙申行幸雲陽宮九月庚申幸同州十一月甲戌至自同州



周書武  
帝紀

四年春正月帝如同州

正月癸酉行幸同州三月丙寅至自同州

周書武  
帝紀

秋七月帝如雲陽宮

七月丙辰行幸雲陽宮丁卯至自雲陽宮

周書武  
帝紀

冬十月帝如同州

十月甲午行幸同州十二月庚午至自同州

周書武  
帝紀

五年春正月帝如同州夏四月再幸同州六月帝如雲陽宮

正月癸未行幸同州三月壬寅至自同州四月乙卯行幸同州五

月壬辰至自同州六月丁巳行幸雲陽宮八月乙卯至自雲陽宮

周書武  
帝紀

六年夏五月帝如雲陽宮



五月癸巳行幸雲陽宮六月丁未至自雲陽宮

周書武帝紀

宣政元年夏五月帝北伐次雲陽宮

突厥入寇五月己丑帝總戎北伐發關中公私驢馬悉從軍癸巳

帝不豫止於雲陽宮丙申詔停諸軍事

周書武帝紀

秋八月帝如同州

是年六月武帝崩宣帝即位

八月壬申行幸同州十月癸酉至自同州

周書宣帝紀

宣帝大象元年秋八月帝如同州

八月庚申行幸同州壬申還宮

周書宣帝紀

冬十一月帝如溫湯遂如同州

十一月乙未幸溫湯戊戌行幸同州壬寅還宮

周書宣帝紀

二年春三月帝如同州

三月辛卯行幸同州增侯正前驅戒道為三百六十重自應門至



於赤岸澤

通鑑赤岸澤在長安北同州南

數十里間幡旗相蔽鼓樂俱作又令武

賁持鉞馬上稱警蹕以至於同州改同州宮為天成宮庚子至自

同州

周書宣帝紀

遣兵屯潼關

宣帝崩高祖以楊尚希督宗室兵三千人鎮潼關

隋書楊尚希傳

**隋**

高祖開皇元年冬十月帝如岐州

十月壬辰行幸岐州十二月庚子至自岐州

隋書文帝紀

二年夏六月作新都

開皇二年六月詔左僕射高頴將作大匠劉龍鉅鹿郡公賀婁子

幹太府少卿高龍乂等創造新都

隋書高祖紀

初帝嫌臺城制度窄小

宮內多鬼妖夜與高頴蘇威二人定議遷都通直散騎常侍庾季



才旦而奏曰臣仰觀天象俯察圖記龜兆允襲必有遷都且堯都平陽舜都冀土是知帝王居止世代不同而漢營此城經今八百歲水皆鹹鹵不甚宜人願陛下協天人之心爲遷徙之計帝愕然謂頰等曰是何神也朕自今已後信有天道矣是時太師李穆上表改都邑帝曰天道聰明已有應徵太師民望復抗此請是則可矣遂發詔施行

冊府元龜

冬十月突厥入寇詔屯兵咸陽以備之

初帝初立待突厥禮薄突厥大怒千金公主傷其宗祀覆滅日夜言於沙鉢略請爲周室復讐沙鉢略謂其臣曰我周之親也今隋主自立而不能制復何面目見可賀敦乎乃悉發五可汗控弦之士四十萬伐隋入長城帝患之勅緣邊修保障詔太子勇屯兵咸陽以備之

通鑑

馮昱叱李長叉李崇皆爲虜所敗於是縱兵來寇上郡



延安六畜咸盡

隋書突厥傳

十二月新都成

十二月景子名新都曰大興城

隋書高祖紀

三年春遷於新都

三月景辰雨常服入新都五月乙巳梁太子琮來賀遷都

隋書高祖紀

秋九月帝如城東

九月壬子幸城東觀稼穀

隋書高祖紀

四年春正月梁王來朝二月帝如隴州九月帝如灊上

正月壬申梁王蕭歸來朝二月乙巳上餞梁王於灊上庚戌幸隴

州突厥可汗阿史那玷率其屬來降九月乙丑幸灊水觀漕渠賜

督役者帛各有差

隋書高祖紀

七年春二月帝如醴泉宮



二月壬申車駕幸醴泉宮

隋書高祖紀

冬十月帝如同州

十月庚申行幸同州以先帝所居降囚徒

隋書高祖紀

十一月帝如馮翊

十一月甲午幸馮翊親祠故社父老對詔失旨上大怒免其縣官

而去

隋書高祖紀

是行也內史李德林以疾不從勅書追之與議伐陳

之計及還隋主馬上舉鞭南指曰待平陳之日以七寶裝嚴公使

自山以東無及公者

綱目

八年冬十一月帝如定城誓師

十月命晉王廣秦王俊清河公素皆爲行軍元帥以伐陳十一月

丁卯車駕餞師乙亥行幸定城陳師誓衆

隋書高祖本紀○按述征記定城去長安三十



九年夏四月帝如驪山

四月己亥幸驪山勞旋師也

冊府元龜

十二年秋七月帝如昆明池

七月壬戌幸昆明池其日還宮

隋書高祖紀

秋八月帝如龍首池

八月乙亥幸龍首池癸巳制宿衛者不得輒離所守

隋書高祖紀

十三年春正月帝如岐州

正月壬戌行幸岐州二月丁亥至自岐州

隋書高祖紀

二月作仁壽宮

二月丙子詔楊素營仁壽宮於岐山之北素奏宇文愷封德彝爲

土木監於是夷山堙谷以立宮殿崇臺累榭宛轉相屬役使嚴急

丁夫多死覆以土石因而築之死者以萬數

通鑑○按明一統志仁壽宮在今麟遊縣



西

秋七月帝如昆明池

七月丁巳幸昆明池

隋書高祖紀

十五年春三月帝如仁壽宮

仁壽宮成三月丁亥幸之時天暑役夫死者相次於道楊素悉焚除之帝不悅及至見制度壯麗大怒曰楊素爲吾結怨天下素聞之慮獲譴封德彝曰公勿憂俟皇后至必有恩詔明日帝果召素入對后勞之曰公知吾夫婦老無以自娛盛飾此宮豈非忠孝賜

賚甚厚

通鑑

冬十一月帝如溫湯

十一月辛酉幸溫湯乙丑至自溫湯

隋書高祖紀

十六年冬十月帝如長春宮



十月己丑幸長春宮十一月壬子至自長春宮隋書高祖紀○按長春宮周時所建

在同州

十七年春二月帝如仁壽宮

二月庚寅幸仁壽宮九月甲申至自仁壽宮隋書高祖紀

十八年春二月帝如仁壽宮

二月甲辰幸仁壽宮九月辛卯至自仁壽宮十二月自京師至仁

壽宮置行宮十有二所隋書高祖紀

十九年春二月帝如仁壽宮冬十月徙突厥染干於五原

二月甲寅幸仁壽宮隋書高祖紀突厥染干尚宗女安義公主患雍虞

閭抄畧請徙五原從之突厥傳

仁壽二年春三月帝如仁壽宮

三月己亥幸仁壽宮九月丙戌至自仁壽宮隋書高祖紀



四年春正月帝如仁壽宮

七月煬帝即位

正月甲子幸仁壽宮

隋書高祖紀

帝將避暑於仁壽宮術士章仇大翼

諫曰是行恐鑾輿不返帝大怒繫之長安獄期還而斬之

通鑑

煬帝大業三年夏四月帝北巡

四月景申車駕北巡狩己亥次赤岸澤六月辛巳獵於連谷

連谷縣名

屬勝州

戊子次榆林郡甲辰上御北樓觀漁於河以宴百僚八月壬

午車駕發榆林啟民可汗飾廬清道以候乘輿帝幸其帳啟民奉

觴上壽宴賜極厚皇后亦幸義成公主帳

隋書煬帝紀

車駕北巡至榆

林遂欲出塞耀兵徑突厥中恐啟民驚懼先遣公孫晟諭旨啟民

奉詔因召所部酋長咸集於是發榆林北境開為御道長三十里

廣百步啟民及義成公主來朝行宮令宇文愷為大帳其下可坐

數千人以宴啟民及其部落諸胡駭悅

通鑑



四年春三月帝如五原

三月乙丑車駕幸五原因出塞巡長城

隋書煬帝紀

行宮設六合板城

載以橐車每頓舍則外其轅以爲外圍內布鐵菱次施弩牀以繩

連機人來觸繩則弩機旋轉向所觸而發

通鑑

五年春三月帝西巡

三月己巳車駕西巡乙亥幸扶風舊宅九月癸未車駕入長安

隋書

煬帝紀

帝出臨津關渡黃河至西平陳兵講之大獵於拔延山將擊

吐谷渾自西京及西北諸郡皆轉輸塞外或遇寇鈔死亡不達及

車駕東還山路險隘魚貫而出風雪晦冥文武饑餒沾濕士卒凍

死者大半後宮妃主或狼狽相失與軍士雜宿山間

通鑑

六年春正月京城大索

正月癸亥朔旦有盜數十人皆素冠練衣焚香持華自稱彌勒佛



入自建國門監門者皆稽首既而奪衛士仗將為亂齊王暕遇而斬之於是都下大索與相連坐者千餘家

隋書楊帝紀

三月築大興城

三月丁丑發丁男十萬城大興

隋書楊帝紀

冬十二月扶風妖人作亂討平之

十二月丁亥扶風人向海明舉兵作亂稱皇帝建元白鳥遣太僕

卿楊義臣擊破之

隋書楊帝紀

桑門向海明於扶風自稱彌勒佛出世

潛謀逆亂人有歸心者輒獲吉夢繇是人皆惑之三輔之士翕然

稱為大聖因舉兵反眾至數萬官軍擊破之

五行志

十年春二月扶風人唐弼舉兵反

扶風人唐弼舉兵反眾十萬推李弘芝為天子自稱唐王

隋書楊帝紀

夏五月延安賊劉迦論舉兵反將軍屈突通討斬之



屈突通仕隋大業中以功遷左驍衛大將軍秦隴盜起授關內討捕大使安定人劉迦論反衆十餘萬據雕陰通發關中兵擊之初不與戰軍中意其怯揚言旋師而潛入上郡賊未之覺引而南去通七十里舍分兵徇地通候其無備夜簡精甲襲破之斬迦論并首級萬餘築京觀於上郡南山虜老弱數萬口

唐書屈突通傳

十二年秋七月馮翊郡反

秋七月戊辰馮翊人孫華自號總管舉兵爲盜

隋書煬帝紀

十三年春二月朔方郎將梁師都反引突厥寇邊

梁師都朔方人仕隋鷹揚府郎將大業末罷歸結徒起爲盜殺郡丞唐世宗據郡自稱大丞相聯兵突厥因畧定雕陰弘化延安自爲梁國僭皇帝位建元永隆始畢可汗遺以狼頭纛號大度毗伽可汗解事天子遂導突厥兵居河南地拔鹽川郡

唐書梁師都傳



三月流人郭子和據榆林反

翊衛郭子和坐事徙榆林會郡中大饑子和潛結敢死士十八人執郡丞數以不恤百姓斬之開倉賑施自稱永樂王南連梁師都北附突厥始畢以子和爲平陽天子子和固辭不敢當乃更以爲屋利設

綱目

秋八月唐師次龍門遂下韓城

任瓌隋仁壽中爲韓城尉未幾罷高祖討捕於汾晉承制署河東縣戶曹義師起瓌至龍門請見高祖曰今主政殘酷兵役不止天下之人思見拯亂與之息肩公天付神武仗順而起軍令嚴明所下城邑無秋毫之犯關中兵起者跣踵而待瓌在馮翊久悉其人情願爲一介使入關宣布威靈以收左輔繇梁山濟河直趨韓城遣郃陽拘朝邑蕭造文吏勢當自下次招諸賊然後鼓行而前



永豐積粟雖未得京師關中固已定矣高祖曰是吾心也廼授銀  
青光祿大夫遣陳演壽史大柰步騎六千趨梁山以瓌及薛獻爲  
招慰大使高祖謂演壽曰聞外事與任瓌籌之既而賊孫華白元  
度等果降且具舟於河以濟師瓌行說下韓城與諸將進擊飲馬  
泉破之拜左光祿大夫留戍永豐倉唐書任瓌傳高祖至河東屈突通  
拒守不下三輔豪傑歸義者日有千數高祖將先定京師猶豫未  
決寂進曰今通據蒲關若不先下前有京城之守後有屈突之援  
此腹背受敵敗之道也未若攻蒲州下之而後入關太宗曰不然  
兵法尚權權在於速宜乘機早渡以駭其心我若遲留彼則生計  
且關中群盜所在屯結未有定主易可招懷賊附兵強何城不克  
屈突通自守賊耳不足爲虞高祖兩從之留兵圍河東而引兵入

關

舊唐書  
裴寂傳



九月唐師濟河次長春宮遣建成守潼關世民徇渭北

九月丙辰馮翊太守蕭造以郡來降戊午華陰令李孝嘗以永豐倉來降庚申高祖率軍濟河舍於長春宮三秦士庶至者日以千數高祖禮之并過所望人皆喜悅丙寅遣隴西公建成司馬劉文静屯永豐倉兼守潼關以備他盜太宗率劉弘基長孫順德等前後數萬人自渭北徇三輔所至皆下

唐書高祖紀

屈突通引兵趣長安劉文静等拒却之

高祖濟河通大懼乃留鷹揚郎將堯君素守蒲將自武關趨藍田以援長安至潼關阻劉文静兵不得進

唐書屈突通傳

段志元從劉文静

拒屈突通於潼關文静爲桑顯和所襲軍且潰志元率壯騎馳賊

殺十餘人中流矢忍不言突擊自如唐兵復振

段志元傳

柴紹妻李氏及李神通等起兵應唐師於渭北關中群盜降於唐



高祖從父弟神通起兵於新柴氏婦高祖女也亦起兵於司竹皆與世民會郿賊邱師利李仲文蓋屋賊何潘仁向善思宜君賊劉炅等皆來降因畧定鄠杜壬申高祖次馮翊乙亥燉煌公世民屯阿城隴西公建成自新豐趨灊上丙子高祖自下邳以西所經隋行宮籓苑悉罷之出宮女還其家

唐書高祖紀

義兵將起公主與紹並

在長安遣使召之紹謂公主曰尊公將掃清多難紹欲迎接義旗同去則不可獨行則恐羅後患爲計若何公主曰君宜速去我一婦人易可藏隱當別自爲計矣紹即行公主乃歸鄠縣莊所遂散家資招引山中亡命得數百人起兵以應高祖時有胡賊何潘仁聚衆於司竹園隋志蓋屋有司竹園自稱總管未有所屬公主遣家僮馬三寶說以利害潘仁攻鄠縣陷之三寶又說群盜李仲文向善思邱師利等各率衆數千人來會時京師留守頗遣軍討公主三寶潘



仁屢挫其鋒公主畧地至整屋武功始平皆下之每申明法令示  
兵士無得侵掠遠近奔赴者甚衆得兵七萬人公主令間使以間  
高祖大悅及義軍渡河遣紹將數百騎趨華陰傍南山以迎公主  
公主領精兵萬餘與太宗軍會於渭北與紹各置幕府號曰娘子  
軍舊唐書平陽公主傳淮安王神通大業末亡命入鄆南山舉兵應太原約  
司竹賊帥何潘仁連和進與平陽公主兵合自署關中道行軍總  
管從平京師唐書淮安王傳時左親衛段綸娶淵女亦聚徒於藍田得萬  
餘人遣使迎淵綱目

冬十月唐師圍長安

十月辛巳次長樂宮有衆二十萬隋留守衛文昇等奉代王侑守  
京城高祖遣使諭之不報乃圍城下令曰犯隋七廟及宗室者罪  
三族唐書高祖紀京兆內史衛文昇年老聞淵軍至憂懼成疾獨將軍



陰世師郡丞骨儀奉代王侑乘城拒守淵如永豐倉勞軍賑饑民進屯馮翊世民所至吏民及羣盜歸之如流世民收其豪俊以備僚屬營於涇陽騰兵九萬李氏將精兵萬餘會世民於渭北隰城尉房元齡謁世民於軍門世民一見如舊識署記室叅軍引爲謀主元齡罄竭心力知無不爲淵命劉弘基殷開山分兵西畧扶風有衆六萬南渡渭水屯長安故城城中出戰弘基逆擊破之世民引兵趣司竹軍令嚴整秋毫不犯遣使白淵請期日赴長安淵命建成選倉上精兵趣長樂宮世民帥新附諸軍北屯長安故城延安上郡雕陰皆請降淵引軍西行十月至長安諸軍皆集合二十餘萬淵命各依壘壁毋得入村落侵暴遣使至城下諭衛文昇等不報命諸軍進圍城

綱目

十一月唐師入長安

是月恭帝即位改元義寧



十一月丙辰克京城命主符郎宋公弼收圖籍約法十二條遙尊

隋帝為太上皇立代王為皇帝甲子高祖入京師至朝堂望闕而

拜隋帝授高祖假黃鉞使持節都督內外諸軍事大丞相錄尚書

事進封唐王唐書高祖紀姚思廉仕隋代王侍讀高祖定京師府僚皆

奔亡獨思廉侍王兵將升殿思廉厲聲曰唐公起義本安王室若

等不宜無禮眾眙却布列階下帝義之聽扶王至順陽閣下泣辭

去觀者歎曰仁者有勇謂此人乎姚思廉傳李靖為馬邑丞高祖擊突

厥靖察有非常志自囚上急變傳送江都至長安道梗高祖已定

京師將斬之靖呼曰公起兵為天下除暴亂欲就大事以私怨殺

誼士乎秦王亦為請得釋引為三衛李靖傳

唐叅軍竇軌及稽胡戰於黃欽山破之

時稽胡賊五萬餘人掠宜春軌討之次黃欽山水經注清水出雲陽縣之石門山東



南流逕黃賊乘高縱火王師小却軌斬其部將十四人拔隊中小

帥代之軌自率數百騎殿後令之曰聞鼓聲有不進者自後斬之

既聞鼓之士卒爭先赴敵賊射之不能止因大破之斬首千餘級

虜男女二萬口

舊唐書  
竇軌傳

十二月薛舉侵扶風唐王遣秦公世民擊敗之

薛舉攻扶風太宗擊敗之斬首萬餘級

唐書太宗紀

仁杲寇扶風汧源

賊唐弼拒不得進初弼立李弘芝為天子有衆十萬舉遣使招弼

弼殺弘芝從舉仁杲聞弼無備襲之盡奪其衆弼以數百騎走軍

益張號二十萬將窺京師會高祖入關遂留攻扶風秦王擊破之

斬首數千級逐北至隴還

唐書薛  
舉傳

河池太守蕭瑀以郡降唐

唐以瑀為禮部尚書封宋國公時榆林漢陽諸郡相繼皆降於唐



綱目○按河池郡後魏置南岐州後周改曰鳳州隋改河池郡

劉文靜大破屈突通於潼關追降之

通至潼關爲劉文靜所遏相持月餘通令桑顯和夜襲文靜詰朝大戰義軍不利縱兵破二柵惟文靜一柵獨存顯和兵復入柵而戰者往復數焉文靜爲流矢所中義軍氣奪垂至於敗顯和以兵疲傳餐而食文靜因得分兵以實二柵又有遊擊數百騎自南山來擊其背三柵之兵復大呼而出表裏齊奮顯和軍潰僅以身免盡虜其衆勢彌蹙或說通降通泣曰吾歷事兩主受人厚祿安可逃難有死而已每自摩其頸曰要當爲國家受人一刀耳勞勉將士未嘗不流涕人亦以此懷之高祖遣其家僮召之通命斬之通聞京師平家屬盡沒乃留顯和鎮潼關率兵東下通適進路而顯和降文靜遣竇琮等與顯和追之擒通送長安高祖曰何相見晚



耶授兵部尚書封蔣國公舊唐書  
突通傳

**唐**

高祖武德元年夏四月張長遜以五原郡降  
是年即隋恭帝義寧二年五月高祖即位改元

武德

張長遜以平陳功累遷五原郡通守遭亂附突厥突厥號為割利  
特勒義兵起以郡降即拜五原太守安化郡公唐書張長遜傳初長遜以  
中原大亂舉郡附突厥時啓民可汗之子號莫賀咄設建牙直五  
原之北薛舉遣使與莫賀咄設謀入寇莫賀咄設許之唐王使都  
水監宇文歆賂莫賀咄設且為陳利害止其出兵又說莫賀咄設  
遣張長遜入朝以五原之地歸之中國莫賀咄設從之長遜以五

原郡降

通鑑

秋七月秦王長史劉文靜等與薛舉戰於高塘敗績



薛舉進逼高塠遊兵至於函岐秦王世民深溝高壘不與戰會世民得瘡疾委軍事於長史劉文静司馬殷開山且戒之曰舉懸軍深入食少兵疲若來挑戰慎勿應也俟吾疾愈爲君等破之開山退謂文静曰王慮公不能辦故有此言耳賊聞王有疾必輕我宜耀武以威之乃陳於高塠西南恃衆而不設備舉潛師掩其後壬子戰於淺水原八總管皆敗士卒死者什五六大將慕容羅睺李安遠劉弘基皆沒世民引兵還長安文静等皆坐除名

通鑑○按高塠城在

今長武縣北

榆林賊帥郭子和來降

子和同州蒲城人爲隋左翊衛以罪徙榆林大業末子和與死士十八人執丞王才斬之自號永樂王建元丑平號其父爲太公以弟子政爲尚書令子端子升爲左右僕射有騎兵二千武德元年



獻欵授靈州總管金河郡公

唐書李和傳

八月遣秦王世民伐薛舉

郝瑗言於薛舉曰唐兵新破關中騷動宜乘勢取長安舉然之會

有疾而止舉卒太子仁果立居於折塢城

一統志云折塢城在宜祿廢城北五里以

秦王世民為元帥擊薛仁果

通鑑

九月薛仁果陷隴州

隴州刺史常達擊薛仁果於宜祿川

通鑑注宜祿川在肅涇二州之間

斬首千餘

級仁果屢攻達不能克乃遣其將件士政以數百人詐降達厚撫

之士政伺隙以其徒刦達擁城中二千人降於仁果達見仁果詞

色不屈仁果壯而釋之奴賊帥張貴謂達曰汝識我乎達曰汝逃

死奴賊耳貴怒欲殺之人救之得免

通鑑

冬十月岐州鄜州賊邵江海降



武德元年十月岐州鄜州邵江海自號新平王遣隴州刺史叔孫

老擊之江海率其衆來降

冊府元龜

十一月秦王世民破薛仁果於淺水原降之

太宗疾間復屯於高墪城相持六十餘日舉死仁果率其衆求戰  
太宗按軍不動久之仁果糧盡衆稍離叛太宗曰可矣乃遣行軍  
總管梁實柵淺水原仁果將宗羅睺擊實太宗遣將軍龐玉救實  
玉軍幾敗太宗率兵出其後羅睺敗走太宗追之至其城下果降  
師還高祖遣李密馳傳勞之於豳州密見太宗不敢仰視退而歎

曰真英主也

唐書太宗本紀

十二月朱粲寇商州戰敗之

鄭元璠及朱粲戰於商州敗之

唐書高祖紀

帝如周氏陂



高祖武德元年十二月乙酉如周氏陂丁亥至自周氏陂

唐書祖紀

按明一統志周氏陂在高陵縣

竈酋旁介地叛入南山伏誅

初竈豪旁介地以所部附薛舉及薛仁果敗介地來降留長安介

地不樂率其衆數千叛入長安南山自南山諸谷出漢川

隋改漢中爲漢

川所過殺掠武侯大將軍龐玉擊之爲介地所敗行至始州掠女

子王氏與俱醉卧野外王氏拔其佩刀斬首送梁州

唐改漢川郡爲梁州其

衆遂潰詔賜王氏爲崇義夫人

通鑑

賊寇涇陽討捕使王師仁擊走之

王師仁爲討捕使武德元年胡賊八千人掠涇陽師仁擊走之

冊府

元通鑑

鄜州刺史梁禮叛將軍蘭興粲擊敗之



蘭興粲為驍騎將軍武德元年鄜州刺史梁禮叛擊破之俘斬千

餘人

冊府元龜

賊陷盤屋將軍趙欽擊破之

趙欽為驍騎武德元年賊帥呂寶生眾七千人破盤屋縣欽擊之

斬首百餘級

冊府元龜

二年春二月將軍何潘仁等及司竹賊戰死之

春二月乙卯左屯衛將軍何潘仁及山賊張子惠戰於司竹死之

庚申驍騎將軍趙欽王婆羅及山賊戰於盤屋死之

唐書高祖紀

夏四月太子建成擊司竹群盜平之

武德二年四月司竹群盜祝山海有眾一千自稱護卿公太子建

成率將軍桑顯和進擊山海平之

冊府元龜

秋九月梁師都寇延州總管段德操擊敗之



師都與突厥千騎營野猪嶺延州總管段德操勒兵不戰師都  
氣懈遣兵進擊戰酣德操以輕騎出其旁乘之師都大潰逐北二  
百里俘馘甚衆未幾以步騎五千入寇德操又盡屠其衆降堡將

張舉劉旻唐書梁師都傳

冬十月帝如華陰

二年十月己卯以秦王世民東伐王世充車駕幸華陰送出師也

冊府元龜時王行本據蒲阪反與劉武周相應關中震駭上出手勅曰

賊勢如此難與爭鋒宜棄大河謹守關西而已秦王世民上表願  
假精兵三萬克復汾晉於是悉發關中兵以益世民所統使擊武

周乙卯幸華陰至長春宮以送之通鑑

祠華山

十月甲子祠華山十二月丙申獵於華山唐書高祖紀



三年春正月獵於渭濱二月如華陰

正月己巳獵於渭濱二月庚子如華陰夏四月丙申祠華山壬寅

至自華陰

唐書高祖紀

秋七月梁師都導突厥稽胡入寇段德操敗之

七月丙戌梁師都導突厥稽胡寇邊行軍總管段德操敗之

唐書高祖

紀師都遣尚書陸季覽說處羅可汗曰隋亡中國裂為四五勢均

力弱皆爭附突厥今唐滅劉武周國益大兵方四出師都將朝夕

亡然次亦及突厥願可汗如魏孝文引兵而南師都請為鄉道處

羅納之令莫賀咄設入五原泥步設與師都趨延州又為德操所

敗

梁師都傳

四年春二月稽胡寇延州總管段德操擊破之

稽胡酋帥劉仝成部落數萬為邊寇詔太子建成統諸軍討之二



月延州總管段德操擊破之

將軍董阿興反討誅之

二月己丑車騎將軍董阿興反於隴州伏誅

唐書高祖紀

冬閏十月帝如稷州遂如周氏陂

閏月乙卯如稷州己未幸舊墅壬戌獵於好時乙丑獵於九夔丁

卯獵於仲山戊辰獵於清水谷遂幸三原辛未如周氏陂

唐書高祖紀

蘇世長武德四年拜諫議大夫從幸涇陽校獵大獲禽獸於旌門

高祖入御營顧謂朝臣曰今日畋樂乎世長進曰陛下遊獵薄廢

萬機不滿十旬未為大樂高祖色變既而笑曰狂態發耶世長曰

為臣私計則狂為陛下國計則忠矣

舊唐書蘇世長傳○按明一統志武德三年以京兆之武

功好時盤屋置稷州九夔志仲山在涇陽縣

十一月李子通叛走至藍田伏誅



杜伏威遣將討子通子通窮乃降伏威受之並樂伯通送京師及  
伏威來朝子通語伯通曰東南未靖而伏威來我故兵多在江外  
若收之可建大功皆亡及藍田爲關吏所獲並伏誅

唐書李  
子通傳

五年秋七月作弘義宮

甲申爲秦王世民營弘義宮使居之

通鑑

八月突厥入寇陷大震關尋引兵還

八月乙卯突厥寇邊庚申皇太子出幽州道以禦突厥

唐書高  
突厥

厥頡利可汗寇邊遣別將入大震關上遣鄭元璿詣頡利責以負

約頡利頗慙元璿因說之曰唐與突厥風俗不同突厥雖得唐地  
不能居也不如還師修好坐受金幣孰與昆弟積年之歡結子孫

無窮之怨乎頡利悅引兵還

通鑑○按大震  
關在今隴州

冬十一月帝如宜州



武德五年十一月丙申幸宜州及卯校獵於富平之北原十二月

丙辰校獵於華池之萬壽原白鹿見帝親御弧矢射而獲之

刪唐元龜

○按鑑注隋以華原同官宜君置宜君郡唐改宜州

六年春二月帝如溫湯三月如昆明池

武德六年二月庚戌幸溫湯戊午校獵於驪山獲白鹿甲寅至自

溫湯三月乙未幸昆明池宴從官極歡而罷

冊府元龜

夏四月段德操攻梁師都破之

師都為德操所破六年其將賀遂索周以所部十二州降德操悉

兵攻之拔東城師都保西城不敢出求救於突厥頡利頡利以勁

兵萬騎赴之先是稽胡大帥劉仝成以眾赴師都因讒見殺其下

疑懼乃多叛師都日益蹙遂往朝頡利教使南畧故突厥盜邊無

寧歲

唐書梁師都傳○按師都時據夏州



六月突厥寇匡州

突厥寇匡州與屯將相勝負

唐書突厥傳○按匡州今套內

冬十月帝如華陰

十月己未幸華陰庚申校獵於白鹿原十一月丁亥校獵於華山

之陰十二月甲寅至自華陰

冊府元龜

七年夏五月作仁智宮六月帝如仁智宮

五月丙戌作仁智宮六月辛丑幸仁智宮避暑

唐書高祖紀

秋閏七月突厥入寇遣秦王世民屯兵豳州以備之

或說上曰突厥所以屢寇關中者以子女玉帛皆在長安故也若

焚長安而不都則胡寇自息矣上以為然秦王世民諫曰陛下聖

武龍興光宅中夏精兵百萬所征無敵奈何以胡寇擾邊遽遷都

以避之貽四海之羞為百世之笑乎願假數年之期請繫頡利之



致致之闕下若其不効遷都未晚上曰善會有司奏突厥入寇詔

世民元吉將兵出邠州以禦突厥

通鑑

八月突厥寇綏州

八月戊寅突厥寇綏州刺史劉大俱敗之壬辰突厥請和

唐書高祖紀

秦王世民與突厥遇於豳州突厥受盟而還

武德七年八月頡利突利二可汗舉國入寇道自原州連營南上

太宗時爲秦王受詔北討與虜遇於豳州醜徒震駭因而請和太

宗許之結盟而去

冊府元龜

初關中霖潦饒道絕軍次豳州可汗萬餘

騎奄至陣五龍坂以數百騎挑戰舉軍失色秦王馳百騎掠陣大

言曰國家於可汗無負何爲深入我秦王也故來自與可汗決若

固欲戰我纔百騎耳徒廣殺傷無益也頡利笑不答又馳騎語突

利曰爾往與我盟急難相助今無香火情耶能一決乎突利亦不



對王將絕水前頡利見兵少又聞與突利語陰相忌即遣使者來  
曰王無苦我固不戰將與王議事耳於是引却秦王縱反間突利  
乃歸心不欲戰乃遣突利及夾畢特勒思摩請和帝許之突利遂  
自託於王為昆弟

唐書突厥傳

冬十月帝如慶善宮遂如終南十二月如躍龍宮

十月丁卯如慶善宮辛未獵於鄠南癸酉幸終南山丙子謁樓觀

老子庚寅獵於圍川

唐書高祖紀

武德七年幸樓觀以太牢祭隋文帝

陵十二月丁卯幸躍龍宮戊辰校獵於高陵庚午至自高陵

冊府元龜

○按慶善宮在武功躍龍宮在高陵

八年夏四月帝如鄠六月幸太和宮

四月甲申幸鄠縣獵於甘谷作太和宮丙戌至自鄠六月甲子如

太和宮七月丙午至自太和宮

唐書高祖紀○按太和宮在長安城南五十里



冬十月帝如周氏陂十一月如宜州

十月辛巳幸周氏陂校獵於北原壬午如躍龍宮十一月辛卯如宜州校獵於西原庚子講武於同官癸丑獵於華池北原十二月

辛酉至自華池

唐書高祖紀

十二月庚辰臘帝曰臘獵以供宗廟朕當

躬其事以申孝享之誠於是車駕巡狩於鳴犢泉之野是日宴從

官賚物綵帛各有差

冊府元龜

九年春三月帝如昆明池

八月太宗即位

三月庚寅幸昆明池習水戰壬辰至自昆明池

唐書高祖紀

帝如周氏陂

丙午如周氏陂乙卯至自周氏陂

唐書高祖紀

秋八月突厥入寇帝帥六師次於渭突厥受盟而還

七月頡利自將十萬騎襲武功京師戒嚴攻高陵尉遲敬德與戰



涇陽獲俟斤烏沒斃斬首千餘級頡利遣謀臣執失思力入朝以覘我因夸說曰二可汗兵百萬今至矣太宗曰我與可汗當面約和爾則背之且義師之初爾父子身從我賜遺玉帛多至不可計何妄以兵入我都畿自誇盛彊耶今我當先戮爾矣思力懼請命蕭瑀封德彝諫帝不如禮遣之帝不許繫於門下省乃與侍中高士廉中書令房元齡將軍周範馳六騎幸渭上與可汗隔水語且責其負約羣酋見帝皆驚下馬羅拜俄而衆軍至旗鎧光明部隊靜嚴虜大駭帝與頡利按轡即麾軍却而陣焉蕭瑀以帝輕敵叩馬諫帝曰我思熟矣非爾所知也夫奚厥掃地入境以我新有內難謂不能師我若闔城彼且大掠吾境故我獨出示無所畏又盛兵使知必戰不意我能沮其始謀彼入吾地既深懼不能返故與戰則克和則固制賊之命在此舉矣是日頡利果請和許之翌日



刑白馬與頡利盟便橋上突厥引還蕭瑀曰頡利之來諸將多請

與戰陛下不聽既而虜自退其策奈何帝曰突厥衆而不整君臣

唯利是視可汗在水西而酋帥皆來謁我我醉而縛之其勢易甚

又我勅長孫無忌李靖潛師幽州以須若大軍躡其後伏邀諸前

取之反覆掌爾然我新即位爲國者要在安靜一與虜校殺傷必

多彼敗未及亡懼而修德與我爲怨其可當耶今卧械卷鎧啗以

玉帛虜志必驕驕則亡之端也故曰將欲取之必固與之瑀再拜

曰非臣愚所逮也

唐書突厥傳

武德末年突厥至渭水橋控弦四十萬

太宗初親庶政驛召衛公問策時發諸州軍未到長安居人勝兵

不過數萬胡人精騎騰突挑戰日數十合帝怒欲擊之靖請傾府

庫賂以求和潛軍邀其歸路帝從其言胡兵遂退於是據險邀之

胡弃老弱而遁獲馬數萬匹玉帛無遺焉

隋唐嘉話



太宗貞觀元年春正月燕郡王李藝寇幽州統軍楊岌討斬之

正月辛丑李藝據涇州反藝之初入朝也恃功驕倨秦王左右至其營藝無故毆之上即位藝內不自安詐稱奉密勅勒兵入朝引兵至幽州幽州治中趙慈皓馳出謁之藝入據幽州詔長孫無忌爲行軍總管討之慈皓聞官軍將至密與統軍楊岌圖之事洩囚慈皓岌在城外覺變勒兵攻之藝衆潰將奔突厥左右斬之傳首

長安

通鑑

二年夏四月遣兵討梁師都朔方人殺之以降

太宗以師都寔危乃諭以書使歸不從詔夏州長史劉旻司馬劉蘭經畧之有得其生口者輒縱遣令爲反間離其君臣之計頻選輕騎踐其禾稼有李正寶辛獠兒者皆其名將謀執師都事洩來降太宗遣右衛大將軍柴紹殿中少監薛萬均擊之又使劉旻劉



蘭率勁卒直據朔方東城以逼之。頡利可汗遣兵來援。師都紹逆擊破之。進屯城下。師都兵勢日蹙。其從父弟洛仁斬師都。詣紹降。以其地爲夏州。

舊唐書梁師都傳

四年春正月。李靖破突厥頡利於鐵山。走之。

四年正月。靖屯惡陽嶺。夜襲頡利。頡利窘走。保鐵山。兵猶數萬。令執失思力來陽。爲哀言。謝罪。請內屬。帝詔鴻臚卿唐儉將軍安修仁等持節慰撫。靖知儉在虜。所虜必安。乃襲擊之。盡獲其衆。頡利得千里馬。獨奔沙鉢羅。

唐書突厥傳。按鐵山。今榆林府河套內。

二月。帝如溫湯。秋九月。如隴州。冬十二月。如鹿苑。

二月己亥。幸溫湯。賜從官帛有差。丙午至。自溫湯。九月己卯。如隴州。十月辛丑。校獵於貴泉谷。賜將士帛有差。甲辰。校獵於魚龍川。親自射鹿。獻獲於太安宮。十一月甲子至。自隴州。十二月甲辰。獵。



狩於鹿苑見野人多藍縷遣侍中王珪賑賜貧人焉乙巳至自鹿

苑

冊府元龜○按武德元年分京兆之高陵置鹿苑縣

五年春正月帝如昆明池冬十二月如溫湯

貞觀五年正月癸酉大蒐於昆明池蕃夷君長咸從帝謂高昌王

麴文泰曰丈夫在世樂事有三耳天下太平家給人足一樂也草

淺獸肥以禮田狩弓不虛發箭不妄中二樂也六合大同萬方咸

寧張樂高宴上下歡洽三樂也今日王可從禽明當歡讌耳丙子

至自昆明池親獻禽於太安宮

冊府元龜

十二月壬寅幸溫湯癸卯獵

驪山賜新豐高年帛戊申至自溫湯

唐書太宗紀

六年春三月帝如九成宮

貞觀六年三月戊辰幸九成宮發使存問高年鰥寡

舊唐書太宗本紀

馬

周上疏曰臣竊惟太上皇春秋已高陛下宜朝夕視膳今所幸宮



去京三百餘里太上皇情或思感而欲即見陛下何以赴之今行  
本為避暑然則太上皇尚留熱所而陛下自逐涼處溫清之道臣  
竊未安然勅書既出願示速返之期以開衆惑馬周傳。按九成宮即隋仁壽宮高祖更名萬年宮在今麟遊縣

秋閏八月帝如岐州九月如慶善宮

貞觀六年閏八月帝在岐州皇太子來朝丙申宴東宮官屬賜帛  
各有差乙巳冊府元龜岐州父老賜帛各有差九月己酉幸慶善宮

十月乙卯至自慶善宮

唐書太宗紀

慶善宮上生時故宅也因宴賦詩

被之管絃命曰功成慶善樂使童子八佾為九功之舞大宴會與  
破陣舞偕奏於庭同州刺史尉遲敬德預宴有班在其上者敬德  
怒曰汝何功坐我上任城王道宗諭解之敬德拳毆道宗目幾眇  
上不懌而罷謂敬德曰朕欲與卿等共保富貴然卿居官數犯法



乃知韓彭趙醢非高祖之罪也敬德由是始懼而自戢

通鑑。按慶善在今

武功縣南

七年夏五月帝如九成宮冬十二月如芙蓉園

五月癸未如九成宮十月庚申至自九成宮十二月甲寅幸芙蓉

園丙辰獵於少陵原

少陵原在長安城南

戊午至自少陵原

唐書太宗紀

帝從太上皇幸未央宮

戊午從上皇置酒故漢未央宮上皇命奚厥頡利可汁起舞又命南

蠻酋長馮智戴詠詩既而笑曰胡越一家自古未有也帝奉觴上

壽曰今四夷入臣皆陛下教誨非臣智力所及昔漢高祖亦從太

上皇置酒此宮妄自矜大臣所不取也上皇大悅殿上皆呼萬歲

通鑑

八年春三月帝如九成宮



三月庚辰如九成宮十月甲子至自九成宮

唐書太宗紀

冬十月作永安宮

上屢請上皇避暑九成宮上皇以隋文帝終於彼惡之十月營永

安宮爲上皇清暑之所未成而上皇寢疾不果居

通鑑。按永安宮在西安府治

東北五里初名永安改曰蓬萊又改曰大明

十二月治兵

十二月丁卯從太上皇閱武於城西

唐書太宗紀

十二年春二月帝如長春宮冬十月如始平

二月甲戌如長春宮乙亥獵於河濱閏二月丙戌至自長春宮十月

己卯獵於始平乙未至自始平

唐書太宗紀

十三年春正月帝如三原謁獻陵夏四月如九成宮

正月乙巳拜獻陵賜宿衛陵邑郎將三原令爵一級丁未至自獻



陵四月戊寅如九成宮十月甲申至自九成宮

唐書太宗紀

突厥結社率反伏誅

初突利可汗之弟結社率入朝為中郎將久不進秩陰結故部落四十餘人作亂夜襲御營折衝孫武開等率眾奮擊久之乃退馳入御廄盜馬北走追獲斬之

綱目

冬十二月帝如咸陽校獵

十二月壬辰獵於咸陽癸巳至自咸陽

唐書太宗紀

十四年春二月帝如溫湯冬閏十月如同州

二月壬午幸溫湯辛卯至自溫湯

唐書太宗紀

閏十月乙未幸同州甲

辰狩於堯山庚戌輿駕還宮

冊府元龜

劉仁軌為櫟陽丞上將幸同州

校獵仁軌上言今秋大稔民收穫者十纔一二使之共承獵事治

道葺橋動費一二萬功實妨農事願少留鑾輿旬日俟其畢務則



公私俱濟上賜璽書嘉紘之鑑

十二月帝如樊川校獵

十二月壬辰臘校獵於樊川遇大雪其夜解圍乙巳輿駕還宮

冊府

元通

十六年冬十一月帝如武功岐陽十二月如溫湯

十一月丙辰上獵於武功壬戌獵於岐山之陽遂幸慶善宮庚午

至自慶善宮

唐書太宗紀

十二月癸卯幸溫湯甲辰獵於驪山上登山

見圍有斷處顧謂左右曰吾見其不整而不刑則墮軍法刑之則是吾登高臨下以求人之過也乃託以道險引轡入谷以避之乙

巳還宮

通鑑

十七年冬十二月如溫湯

十二月庚申幸溫湯庚午至自溫湯

唐書太宗紀



十八年春正月帝如鍾官城夏四月如九成宮

貞觀十八年正月乙未幸鍾官城庚子幸鄆縣壬寅幸溫湯二月

己酉幸靈口村落偏側問其受田丁三十畝遂夜分而寢憂其不

給詔雍州錄尤少田者並給復移之於寬鄉乙卯還宮冊府元龜四月

辛亥幸九成宮壬子至太平宮在今鄆縣東南三十里乙未至顯仁宮在今鄆縣

八月甲子還京師通鑑

十九年冬十二月薛延陀入寇大敗之遣兵戍勝州

帝詔思力屯金州道領突厥扞薛延陀延陀兵十萬寇河南鑑註北河

之南即朔方新秦之地思力示羸不與确賊深入至夏州乃整陣擊敗之追

躡六百里會毗伽可汗死耀威磧北而歸唐書執失思力傳多彌可汗寇

邊帝遣江夏王道宗都督薛萬徹與左驍衛大將軍阿史那社尒

屯勝州執失思力與突厥掎掎塞下虜知有備乃去回鶻傳



二十年秋八月帝如涇陽遂踰隴

庚午車駕至涇陽回紇等十一姓各遣使入貢乞置官司上大喜

壬申幸漢甘泉宮丙戌踰隴山九月丙戌車駕還京師

通鑑

二十一年夏四月作翠微宮五月帝如翠微宮

夏四月乙丑營太和宮於鍾南之上改為翠微宮五月戊子幸翠

微宮

舊唐書太宗本紀

上幸翠微宮冀州進士張昌齡獻翠微宮頌上愛

其文命於通事舍人裏供奉

通鑑

秋七月作玉華宮

七月庚子建玉華宮於宜君縣之鳳凰谷庚戌至自翠微宮

舊唐書太宗本紀

太宗本紀

二十二年春正月帝如溫湯二月如玉華宮

正月戊戌幸溫湯癸卯御製溫湯碑以示群臣戊申還宮二月乙



亥行幸玉華宮三月丙戌至自玉華宮

冊府元龜

貞觀末稍治宮室百

姓勞怨惠上疏極諫言翠微玉華等宮雖因山藉水無築構之苦

而工力和儻不謂無煩帝善其言優賜之

唐書太宗賢妃徐惠傳

二十三年夏四月帝如翠微宮

四月乙亥幸翠微宮

唐書太宗紀

高宗永徽四年冬十月帝如溫湯

十月庚子幸溫湯乙巳至自溫湯

唐書高宗紀

五年春二月帝如萬年宮遂如鳳泉

二月戊午幸萬年宮乙丑次鳳泉湯九月丁酉至自萬年宮

唐書高宗

紀高宗幸萬年宮山水暴至夜突元武門宿衛皆散走仁貴曰當

天子緩急安可懼死遂登門大呼以警宮內帝遽出乘高俄而水

入帝寢帝曰賴卿以免始知有忠臣也賜以御馬

唐書薛仁貴傳  
○按括地志鳳



東溫湯在  
岐州郿縣

冬十月築長安郭城

十月癸卯築京師羅郭起觀於九門

唐書高宗紀

六年春正月帝如醴泉謁昭陵

正月壬申拜昭陵陵所宿衛進爵一級癸酉以少牢祭陪葬者甲

戌至自昭陵

唐書高宗紀

龍朔二年春三月帝如同州

三月癸丑如同州四月庚申至自同州

唐書高宗紀

夏四月作蓬萊宮

四月辛巳作蓬萊宮

通鑑

冬十月帝如溫湯

十月丁酉幸溫湯皇太子監國丁未至自溫湯

唐書高宗紀



麟德元年春二月帝如萬年宮

二月戊子發京師幸福陽宮癸卯至萬年宮八月丙子至自萬年

宮便幸舊宅停七日壬午還蓬萊宮

冊府元龜

總章元年春二月帝如九成宮

二月戊寅幸九成宮八月癸酉至自九成宮

唐書高宗紀

二年夏四月帝如九成宮

四月己酉如九成宮九月壬寅如岐州十月丁巳至自岐州

唐書高宗紀

上幸九成宮冬十月車駕還京仍西巡校獵自麟遊西北遶岐

梁歷晉潤

隋志晉潤縣名大業初置屬扶風郡

丁巳還長安

文獻通考

咸亨元年帝如九成宮

四月庚午幸九成宮八月丁巳至自九成宮

唐書高宗紀

四年夏四月帝如九成宮



咸亨四年四月丙子發京師幸九成宮十月庚子發九成宮乙巳

至京師

冊府元龜

上元元年冬十一月帝如華山校獵

咸亨五年十一月丙午朔車駕發京師己酉畋於華山之曲武原

冊府元龜

儀鳳元年四月帝如九成宮

四月戊午幸九成宮冬十月乙未至自九成宮

唐書高宗紀

二年春正月帝如司竹園

正月庚辰幸司竹園即日還宮

冊府元龜

三年夏五月帝如九成宮

五月壬戌如九成宮九月辛酉至自九成宮

唐書高宗紀

弘道元年夏四月綏州步落稽作亂討平之



綏州步落稽白鐵余埋銅佛於地中久之草生其上給鄉人曰吾  
於此數見佛光集衆掘地果得之因曰得見聖佛者百疾皆愈遠  
近附之數年歸信者衆遂謀作亂據城平縣故址在延安府  
宜君縣西北稱皇  
帝置百官攻綏德大斌二縣殺官吏焚民居遣右武衛將軍程務  
挺與王方翼討之擒鐵余餘黨悉平通鑑

武后神功元年春正月突厥寇勝州邊兵擊破之

正月癸亥突厥默啜寇勝州平狄軍副使安道買敗之唐書武  
后紀

中宗景龍二年春三月築三受降城

初朔方軍與突厥以河爲境時默啜悉衆西擊突騎施仁愿請乘  
虛取漠南地於河北築三受降城首尾相應絕虜南寇路六旬而  
三城就相距各四百餘里皆據津要自是突厥不敢踰山牧馬朔  
方益無寇歲捐費億計減鎮兵數萬初建三城也不置壅門曲敵



戰格或曰邊城無守備可乎仁愿曰兵貴攻取賤退守寇至當併力出拒敢回望城者斬何事守備退忸其心哉

唐書張仁愿傳

三年冬十二月帝如温湯

景龍三年十二月甲午幸新豐之温湯庚子幸兵部韋嗣立莊舍

宴賜甚厚特封谷爲幽栖谷是月幸驪山乙巳至自温湯

冊府元龜

兵

部尚書韋嗣立景龍中中宗與韋后幸其莊封嗣立爲逍遙公又

改其居鳳凰原爲清虛原鸚鵡谷爲幽栖谷

隋唐嘉話

四年夏四月帝如隆慶池

六月睿宗即位改元景雲

初武后之世長安城東民家井溢浸成大池數十頃號隆慶池相

王子五王列第於其北望氣者言常鬱鬱有帝王氣比日尤盛上

幸池宴侍臣以獸之

通鑑

元宗先天元年冬十月帝如新豐校獵



先天元年十月癸卯從太上皇幸新豐獵於驪山之下命從官宴設擣蒲焉賜帛各有差十二月癸卯帝幸新豐之溫湯便獵於渭

川冊府元龜

開元元年帝如驪山治兵

先天二年十月癸卯親講武於驪山之下徵兵二十萬旌旗連亘五十餘里戈鋌金甲照耀天地列大陣於長川坐作進退以金鼓之聲節之三軍出入號令如一帝親擐戎服持沉香大鎗立於陣前威振宇宙長安士庶奔走縱觀填塞道路冊府元龜

二年秋七月作興慶宮

九月庚寅作興慶宮

唐書元宗紀。按興慶宮在西安府治東南五里

帝如溫湯及長春宮

戊戌幸溫湯十月戊午至自溫湯唐書元宗紀



三年冬十月帝如眉十一月如溫湯

十月癸亥如郿甲子如鳳泉湯十一月己卯至自鳳泉湯乙酉辛

溫湯甲午至自溫湯

唐書元宗紀

四年春二月帝如溫泉湯冬十二月如溫湯

二月丙辰幸溫泉湯丁卯至自溫泉湯

唐書元宗紀

七年冬十月帝如溫湯

開元七年十月辛卯幸新豐之溫湯癸卯至自溫湯

冊府元龜

八年夏六月朔方突厥降戶謀作亂長史張說慰安之

突厥降戶僕固都督勾磨及跋跌部落散居受降城側朔方大使

王峻言其陰引突厥謀陷軍城誘僕勾磨等於受降城伏兵殺之

拔曳固同羅諸部聞之皆恐懼并州長史張說引二千騎持節即

其部落撫慰之由是遂安

通鑑



冬十月帝如長春宮

八年十月辛卯幸長春宮壬午改於華州之下却庚寅遂幸溫泉

十一月辛卯至自長春宮

冊府元龜

九年春正月帝如溫湯

開元九年正月甲寅幸新豐之溫湯乙亥至自溫湯

冊府元龜

夏四月蘭池胡寇夏州遣兵討之

蘭池州胡康待賓誘諸降戶同反夏四月攻陷六胡州

宋白曰六胡州在夏

州德靜縣有衆七萬進逼夏州命朔方大總管王晙隴右節度使郭知

運討之

通鑑

秋七月王晙擊康待賓擒斬之

秋七月己酉王晙大破康待賓生擒之殺叛胡萬五千人辛酉集西夷酋長腰斬待賓於西市先是叛胡潛與党項通謀攻銀城連



谷杜佑曰銀城連谷皆漢圖陰縣地

據其倉庾張說將步騎萬人揜擊大破之追

至駱駝堰党項更與胡戰胡衆潰走說安集党項使復其居業因

奏置麟州

一統志云麟州本漢五原西河二郡地元改爲神木縣連谷縣故址在神木縣北一十里

以鎮撫党

項餘衆

通鑑

冬十二月帝如溫湯

十二月乙酉幸新豐之溫湯壬辰至自溫湯

唐書元宗紀

十年秋八月京兆人權梁山反伏誅以宋璟守西京

王志愔爲揚州長史帝幸東都詔留守京兆人權梁山妄稱

襄王子與左右屯營官謀反自稱光帝夜犯長樂門入宮城將殺

志愔志愔踰垣走而屯營兵悔更斬梁山等自歸志愔慙悸卒

唐書

王志愔傳

權梁山謀反勅河南尹王怡馳傳往按牢械充滿久未決乃

命璟爲京留守復其獄平縱數百人

宋璟傳



九月朔方節度大使張說討康待賓餘黨平之

四月己亥張說持節朔方軍節度大使九月張說敗康願子於木

盤山執之

唐書元宗紀

康待賓餘黨康願子反自稱可汗張說至朔方

發兵討擒之其黨悉平徙殘胡五萬餘口於許汝等州空河南朔方千里之地先是緣邊戍兵常六十餘萬說以時無彊寇奏罷二十餘萬使歸農上以爲疑說曰臣久疆場具知其情將帥苟以自衛及役使營私而已若禦敵制勝不必多擁冗卒以妨農務上乃

從之

通鑑

十一年冬十月帝如溫湯初作宮十二月如鳳泉湯

十一年十月丁酉幸新豐之溫湯置溫泉宮甲寅至溫泉宮十二月甲午幸鳳泉湯詔有司萬事自備不得干擾百姓戊申至自鳳

泉湯

冊府元龜



十五年十二月帝如溫泉宮

十一月丁卯獵於城南十二月乙亥幸溫泉宮丙戌至自溫泉宮

唐書元

宗紀

十六年冬十月帝如溫泉宮十二月如溫泉宮

十月己卯幸溫泉宮乙丑至自溫泉宮十二月丁卯幸溫泉宮丁

丑至自溫泉宮

唐書元  
宗紀

十七年冬十一月帝行謁諸陵十二月如溫泉宮

十一月丙申拜橋陵戊戌拜定陵己亥拜獻陵壬寅拜昭陵乙巳

拜乾陵戊申至自乾陵

唐書元  
宗紀

開元中有事五陵有司以鷹犬從

姚崇子奕曰非禮也奏罷之

白孔  
六帖

十二月辛酉幸溫泉宮壬申至

自溫泉宮

唐書元  
宗紀

十八年夏四月築郭城



四月乙卯築京師外郭

唐書元宗紀

冬十月帝如鳳泉湯十一月如溫泉宮

十月庚寅幸岐州之鳳泉湯癸卯至自鳳泉湯

冊府元龜

十一月丁卯

幸溫泉宮丁丑至自溫泉宮

唐書元宗紀

二十一年春正月帝如溫泉宮冬十月如溫泉

正月丁巳幸溫泉宮丁亥至自溫泉宮十月庚戌幸溫泉宮己未

至自溫泉宮

唐書元宗紀

二十三年冬十二月命畿內舉賢守令賜帛各有差

開元二十三年十二月命十道採訪使舉賢刺史縣令以隴州刺

史武崇節京兆府高陵縣令裴迴京兆府整屋縣令戴休琰京兆

府奉先縣令李知止京兆府涇陽縣令韋伯祥等聞上降書宣慰

刺史賜帛八十匹縣令五十匹勅之曰卿等各能用心副朕所委



今茲歲會風政有歸是用激揚以勵清操

冊府元龜

二十四年夏五月醴泉人劉志誠反伏誅

醴泉妖人劉志誠作亂驅掠路人將趣咸陽村民走縣官焚橋斷路以拒之其衆遂潰數日悉擒斬之

通鑑

二十五年冬十一月帝如溫泉宮

十一月壬申幸溫泉宮乙酉至自溫泉宮

冊府元龜

二十六年冬十月帝如溫泉宮

十月戊寅幸溫泉宮壬辰至自溫泉宮

唐書元宗紀

二十七年冬十月帝如溫泉宮

十月丙寅幸溫泉宮十二月辛丑至自溫泉宮

唐書元宗紀

二十八年春正月帝如溫泉宮

正月癸巳幸溫泉宮庚子至自溫泉宮

唐書元宗紀



夏五月立元元皇帝廟

二十八年五月帝謂宰臣曰朕在藩邸有宅在積善里東南隅宜

於此地置元元皇帝廟及崇元學

文獻通考

冬十月帝如溫泉宮

十月甲子幸溫泉宮辛巳至自溫泉宮

唐書元宗紀

二十九年春正月帝如溫泉宮

正月癸巳幸溫泉宮庚子至自溫泉宮

唐書元宗紀

夏四月迎元元皇帝像於盤屋

二十九年四月上憂元元皇帝云吾像在京城西南百餘里遣使

求得之於盤屋迎置興慶宮

文獻通考

冬十月帝如溫泉宮

十月丙申幸溫泉宮十一月辛酉至自溫泉宮

唐書元宗紀



天寶元年春二月祠元元皇帝廟

正月甲寅陳王府參軍田國秀言元元皇帝降於丹鳳門通衢二

月辛卯享元元皇帝於新廟

唐書元宗紀

冬十月帝如溫泉宮

十月丁酉幸溫泉宮十一月己巳至自溫泉宮

唐書元宗紀

二年春正月作昇仙宮

正月乙卯作昇仙宮丙辰加號元元皇帝曰大聖祖三月壬子享

於元元宮改元元宮曰太清宮

唐書元宗紀

冬十月帝如溫泉宮

十月戊寅幸溫泉宮十一月乙卯至自溫泉宮

唐書元宗紀

三載春正月帝如溫泉宮冬十月帝如溫泉宮

正月辛丑幸溫泉宮二月庚午至自溫泉宮十月甲午幸溫泉宮



十一月丁卯至自溫泉宮

唐書元宗紀

四載冬十月帝如溫泉宮

四載十月戊戌幸溫泉宮十二月至自溫泉宮

唐書元宗紀

五載冬十月帝如溫泉宮

五載戊戌幸溫泉宮十一月乙巳至自溫泉宮

六載冬十月帝如華清宮

六載十月戊申幸華清宮十二月癸丑至自華清宮

唐書元宗紀

幸驪山溫泉改溫泉宮曰華清宮

通鑑

元宗廣溫泉為華清宮環宮

所置百司區署以珣資機算詔總經度驪山疏巖剔藪為天子遊

觀

唐書房珣傳

十二月築會昌城置百司王公第舍

十二月壬戌發馮翊華陰民夫築會昌城置百司王公各置第舍



土畝直千金

通鑑

自開元來每歲十月臨幸溫泉歲盡乃歸以新豐

去泉稍遠即於湯所置會昌縣又置百司及公卿邸第焉

元和志

七載冬十月帝如華清宮

天寶七年十月庚戌幸華清宮辛酉還宮

冊府元龜

唐明皇常歲十月

幸華清宮春乃還而諸楊湯沐館在宮東垣連蔓相照帝臨幸必

徧五家

白孔六帖

八載夏六月謁太清宮

六月丙寅謁太清宮加上元元皇帝號曰聖祖大道元元皇帝

唐書

元宗紀

天寶八載六月太白山人李渾上言有神人言金星洞内有

版石記聖皇福壽之符命御史中丞王鉷入仙遊谷求而獲之以

獻帝御勤政樓受焉

冊府元龜

冬十月帝如華清宮



十月乙丑幸華清宮九載正月己亥至自華清宮

唐書元宗紀

九載冬十月帝如華清宮

天寶九載十月庚申幸華清宮改驪山為昌山十二月乙亥還宮

冊府元龜

十載春正月謁太清宮

天寶九載十月太白山人王元翼上言元元皇帝降見言寶仙洞中有妙寶真符詔刑部尚書王儼等獲之十載正月壬辰獻於太

清宮

冊府元龜

冬十月帝如華清宮

十月壬子幸華清宮十一載正月丁亥至自華清宮

唐書元宗紀

十一載夏四月京兆人邢緯謀反伏誅

京兆人王鉷權寵日盛領二十餘使鉷第戶部郎中鐸凶險不法



召術士任海川問我有王者之相否海川懼亡匿鉞恐事洩捕得杖殺之王府司馬韋會話之私庭鉞又使長安尉賈季隣收會縊殺之鐸所善刑綽與龍武萬騎謀作亂有告之者上以狀面受鉞使捕之鉞意鐸在綽所先遣人召之乃命季隣等捕綽綽帥其黨格鬪會高力士引集軍至擊斬綽捕其黨皆擒之國忠以狀白上曰鉞必預謀上以鉞恩遇深不應同逆乃命特原鐸不問然意欲鉞表請罪之使國忠諷之鉞不忍上怒會陳希烈極言鉞大逆當誅勅希烈與國忠鞠之於是任海川韋會等事皆發獄具鉞賜自盡鐸杖死於朝堂

通鑑

十二載冬十月帝如華清宮

十月戊寅幸華清宮十三載正月丙午至自華清宮

唐書元宗紀

楊國

忠與虢國夫人居第相隣晝夜往來無復期度或並轡走馬入朝



不施障幕道路掩目三夫人將從幸華清宮會於國忠第車馬僕從充溢數坊錦繡珠玉鮮華奪目國忠謂客曰吾本寒家一旦緣椒房至此未知稅駕之所然終不能致令名不若且極樂耳上在華清宮欲夜出遊龍武大將軍陳元禮諫曰宮外即曠野安可不備不虞上為之引還通鑑

十三載冬十月帝如華清宮

天寶十三載十月乙酉幸華清宮十二月戊午還宮冊府元龜

十四載冬十月帝如華清宮

天寶十四載十月庚寅幸華清宮十一月丙子還宮冊府元龜

十二月封常清討安祿山敗績高仙芝退保潼關

祿山反榮王為元帥仙芝副之領飛騎曠騎及朔方等兵出禁財募關輔士五萬繼封常清東討詔監門將軍邊令誠監軍次陝郡



而常清敗仙芝引兵趨潼關會賊至甲仗資糧委於道路既至潼關勒兵繕守具士氣稍稍復振賊攻關不得入

唐書高仙芝傳

常清戰敗

奔陝語高仙芝曰賊銳甚難與爭鋒潼關無兵一夫奔突則京師

危不如急守潼關仙芝從之

一封常清傳

詔監軍邊令誠斬高仙芝封常清於潼關以哥舒翰為兵馬副元帥守潼關

監軍邊令誠數以事干仙芝不從令誠入奏事云常清以賊搖眾仙芝棄地數百里又盜減軍士糧賜上大怒遣令誠齎勅即軍中斬仙芝常清初常清既敗三遣使陳賊形勢上皆不之見乃自馳詣關至渭南勅削其官爵令還軍自効常清草遺表曰臣死之後望陛下不輕此賊無忘臣言令誠至潼關先引常清宣勅示之常清以表附令誠上之常清既死令誠乃謂仙芝曰大夫亦有恩命



仙芝遽下令誡宣勅仙芝曰我遇賊而退死則宜矣謂我盜減糧  
賜則誣也時士卒在前大呼稱枉其聲震地遂斬之隴右節度使  
哥舒翰病廢在家上籍其威名且素與祿山不協召見拜兵馬副  
元帥將兵八萬并仙芝舊卒號二十萬軍於潼關翰用法嚴而不  
恤士卒皆懈弛無鬪志

通鑑

十五載春正月賊兵寇潼關

是月肅宗即位改元至德

安祿山遣子慶緒攻關翰擊走之

唐書哥舒翰傳

夏六月哥舒翰及賊戰敗績賊陷潼關

或說翰曰祿山本以誅國忠故稱兵今若留卒三萬守關悉精銳  
渡澶水誅君側此漢挫七國計也翰猶豫未發謀頗露國忠大駭  
入見帝曰兵法安不忘危大兵在潼關而無後殿萬一不利京師  
危矣既募牧兒三千人日夜訓練以劍南列將分統之又募萬人



屯灞上使腹心杜乾運爲帥翰疑圖已表請乾運兵隸節下因詔乾運計事至軍卽斬首梟牙門并其軍國忠愈恐翰亦不自安數奏言祿山不得人心請持重以敝之待其離隙可不血刃而擒賊將崔乾佑守陝郡仆旗鼓羸師以誘戰國忠謬說帝趨翰出潼關復陝洛使者頂背相望翰窘慟哭出關戰旣敗翰引數百騎絕河還營羸兵裁八千至潼津收散卒復守關乾佑進攻於是火拔歸仁等給翰出關翰失守華陰馮翊上洛郡官吏皆潰

唐書哥舒翰傳

帝西巡以崔光遠守西京

翰麾下來告急上不時召見及暮平安火不至上始懼壬辰召宰相謀之楊國忠首唱幸蜀之策上然之甲午上御勤政樓下制云欲親征聞者皆莫之信以崔光遠爲京兆尹充西京留守旣夕命龍武大將軍陳元禮整比六軍乙未黎明上獨與貴妃姊妹皇子



妃主皇孫及親近宦官宮人出延秋門妃主皇孫之在外者皆委之而去上過便橋楊國忠使人焚橋上曰士庶各避賊求生奈何絕其路留高力士使撲滅乃來至咸陽日向中上猶未食民爭獻糲飯雜以麥豆皇孫輩爭以手掬食之須臾而盡猶未能飽有老父郭從謹進言曰祿山包藏禍心固非一日有告其謀者陛下徃徃誅之使得逞其奸逆致陛下播越臣猶記宋璟為相數進直言天下賴以安自頃以來在廷之臣以言為諱闕門之外陛下皆不得而知草野之臣必知有今日久矣但九重嚴邃區區之心無路上達事不至此臣何由得睹陛下之面而訴之乎上曰朕之不明悔無所及慰諭而遣之命軍士散村落求食夜將半乃至金城

縣本始平縣中宗景龍二年送金城公主延吐蕃至此更名金城

縣令亦逃縣民皆走驛中無

人相枕藉而寢貴賤無以復辨

通鑑



帝次馬嵬

丁酉至馬嵬驛將士饑疲皆憤怒陳元禮以禍由楊國忠欲誅之  
會吐蕃使者二十餘人遮國忠馬訴以無食軍士呼曰國忠與虜  
謀反追殺之以槍揭其首於驛門外並殺韓國秦國夫人上聞誼  
譁杖屨出驛門慰勞軍士令收隊軍士不應上使高力士問之元  
禮對曰國忠謀反貴妃不宜供奉願陛下割恩上入門倚杖傾首  
而立久之高力士曰貴妃誠無罪然將士已殺國忠而貴妃在陛  
下左右豈敢自安願陛下審思之將士安則陛下安矣乃命力士  
引貴妃於佛堂縊殺之於是始整部伍爲行計國忠妻子及虢國  
夫人走陳倉縣令薛景仙誅之通鑑韋諤歷京兆府司錄參軍國忠  
死軍聚不解陳元禮請殺貴妃以安衆帝意猶豫諤曰臣聞以  
計勝色者昌以色勝計者亡今宗社震驚陛下棄神器奔草莽唯



割恩以安社稷因叩頭流血帝悟賜貴妃死軍乃大悅擢諤御史中丞爲置頓使乘輿將行帝心向蜀未言諤曰今兵少不能捍賊還京非萬全計不如至扶風徐圖去就帝問於衆衆然之遂至扶

風乃決西幸

唐書韋諤傳

戊戌帝發馬嵬留太子東討賊

戊戌發馬嵬父老遮道請留上令太子宣慰父老父老曰至尊旣不肯留某等願帥子弟從殿下東破賊取長安若殿下與至尊皆入蜀使中原百姓誰爲之主須臾衆至數千人太子不可涕泣跋馬欲西建寧王倓與李輔國執鞚諫廣平王俶亦勸太子留父老共擁太子馬不得行上總轡待太子久不至使人偵之還白狀上曰天也乃分後軍及飛龍廐馬從太子又使送東宮內人於太子

通鑑

承天皇帝倓始王建寧英毅有才畧善騎射祿山亂典親兵扈



車駕渡渭百姓遮道留太子太子使喻曰至尊播遷吾可以違左  
右乎倓進說曰逆胡亂常四海崩分不因人情圖興復雖欲從上  
入蜀而散關以東非國家有夫大孝莫若安社稷殿下當募豪傑  
趨河西收牧馬今防邊屯士不下十萬而光弼子儀全軍在河朔  
與謀興復策之上者廣平王亦贊之於是議定太子北過渭兵仗  
濫惡士氣崩沮日數十戰倓以驍騎數百從每接戰常身先血殷  
袂不告也太子或過時未食倓涕泗不自勝三軍皆屬目唐書承  
天皇帝  
倓傳天寶末元宗幸蜀輔國侍太子扈從至馬嵬乃獻計分兵北如  
朔方以圖興復冊府元龜肅宗為皇太子元宗幸蜀留上在後宣諭百  
姓賊追至渭北便橋已斷水瀑漲無舟楫上號令水濱百姓歸者  
三千餘人渭水可涉又遇潼關散卒誤以為賊與之戰士衆多傷  
乃收其餘衆北上軍既濟其後皆溺上喜以為天之佑時從上惟



廣平建寧二王及四軍將士纔二千人自奉天而北夕次永壽百姓遮道獻牛酒有白雲起西北長數丈如樓閣之狀議者以爲天子之氣自是紱雲擁帝所乘馬聚散不時

鴻書

### 安祿山陷長安

祿山遣孫孝哲安神威西攻長安會哥舒翰守潼關爲乾佑所敗賊不謂天子能遽去駐兵潼關十日乃西時行在已至扶風於是汧隴以東皆沒於賊祿山未至長安士人皆逃入山谷東西驛驛二百里宮嬪散匿行哭將相第家委寶貨不貲群不逞爭取之累日不能盡又剽左藏大盈庫百司帑藏竭乃火其餘祿山至怒乃大索三日民間財貲盡掠之府縣因株根牽連旬剝苛急百姓愈騷祿山怨慶宗死乃取帝近屬自霍國長公主諸王妃妾子孫姻壻等百餘人害之以祭慶宗群臣從天子者誅滅其宗虜性得所



欲則肆爲殘虐人益不附諸大將欲有咨決皆因嚴莊以見御下  
少恩雖腹心雅故皆爲仇敵郡縣相與殺守將迎王師前後反覆  
十數城邑墟矣長安相傳太子西來矣人間輒東走關里至空都  
畿豪傑殺賊吏自歸者無虛日賊斬刈懲之不能止又賊將類慄  
勇無遠謀日縱酒嗜聲色財利車駕危得入蜀終無追躡之患

唐書

安祿山傳

### 帝次扶風

己亥次扶風軍士各懷去就咸出醜言陳元禮不能制上患之會  
益州貢春綵十萬匹上命悉置於庭召諸將諭之曰卿等國家功  
臣陳力久矣朕之優獎常亦不輕逆胡背恩事須迴避甚知卿等  
不得別父母妻子言發涕流曰朕須幸蜀路險人多恐難供承今  
有此綵宜分取各圖去就朕自有子弟中官相隨便與卿等訣別



衆咸俯伏涕泣曰死生願從陛下上曰去住任卿自此背亂之言

稍息

舊唐書  
元宗紀

帝次散關

辛丑發扶風郡是夕次陳倉壬寅至散關分部下爲六軍頴王璦

先行壽王瑁等分統六軍前後左右相次

舊唐書元宗紀○按散關今在寶雞縣西南

帝至河池以隴公瑀爲梁州都督

丙午至河池郡

唐書元宗紀

陳倉令薛景仙復扶風

戊申扶風人康景龍等殺賊宣慰使薛總等二百餘人陳倉令薛

景仙率衆收扶風郡守之由是關輔豪右皆謀殺賊賊故不敢侵

軼

舊唐書  
肅宗紀

九月詔以房瑄爲招討西京兵馬元帥



房琯至德初抗疏自請將兵以誅寇孽收復京師肅宗望其成功許之詔加持節招討西京兼防禦蒲潼兩關兵馬元帥王思禮副之南軍入於宜壽中軍入於武功北軍入於奉天

冊府元龜

賊入汧隴隴右採訪使郭英乂破之

賊將高嵩擁兵入汧隴英乂偽勞之且具饗既而伏兵發盡虜其

衆

唐書郭英乂傳

冬十月房琯及賊戰於陳濤斜敗績

十月庚子次便橋辛丑中軍北軍遇賊陳濤斜戰不利琯欲持重

有所伺中人刑延恩促戰故敗癸卯率南軍復戰遂大敗初琯用

春秋時戰法以車二千乘繚營騎步夾之既戰賊乘風譟牛悉解

栗賊投芻而火之人畜焚燒殺卒四萬血丹原野殘衆才數千不

能軍琯還走行在見帝肉袒請罪帝宥之

唐書房琯傳○按括地志陳濤斜在咸陽縣東



十二月郭子儀率回紇擊同羅於榆林河北破之

十二月戊午回紇至帶汗谷與郭子儀軍合辛酉與同羅及叛胡

戰於榆林河北大破之斬首三萬捕虜一萬河曲皆平子儀還軍

洛交

通鑑○按注洛交郡本鄜州上郡天寶元年更郡名

肅宗至德二載春二月帝至鳳翔

二月戊子上至鳳翔旬日隴右河西諸鎮皆會江淮庸調亦至洋

川漢中長安人聞車駕至從賊中自拔而來者日夜不絕

通鑑

關西兵馬使郭英乂及賊戰於武功敗績

關內節度使王思禮軍武功兵馬使郭英乂軍東原王難得軍西

原賊將安守忠等寇武功郭英乂戰不利矢貫其頤而走王難得

望之不救亦走思禮退軍扶風賊遊兵至大和關去鳳翔五十里

鳳翔大駭戒嚴

通鑑



朔方節度使郭子儀擊賊於潼關破之

二月朔方節度使郭子儀大破賊將崔乾祐於潼關

舊唐書  
肅宗紀

正月

二十八日使宗子懷文潛募郭俊苟文俊入河東搆忠義與大軍

期約以翻城公乃進軍出洛交分兵收馮翊二月十一日郭俊等

俟大軍將至舉火剋斬幽檀勁卒千人崔乾運尋縋而免乾祐先

置兵於城北廢府遂以三千兵攻城自領馬步五千伏於關城中

公使盱及僕固懷恩等先擊之賊大破遽焚橋我軍陷之而滅乾

祐棄關城尋白涇嶺而逸

汾陽  
家傳

賊陷同州刺史蕭蕢死之

子儀襲下潼關及同州盛兵潼關以守之賊將李歸仁來救子儀

大戰死者萬餘人退守河東歸仁遂攻陷同州州守蕭蕢死之盡

屠城中

唐  
曆



夏四月兵馬副元帥郭子儀及賊戰於清渠敗績

郭子儀詔還鳳翔進司空充關內河東兵馬副元帥率師趨長安

次滴水上守忠等軍清渠左大戰王師不利委杖奔子儀收潰卒

保武功

唐書郭子儀傳

子儀赴鳳翔李歸仁以勁卒五千邀之於三原北

子儀使懷恩及王昇陳迴光等伏兵於白渠留運橋以待之伏發

歸仁大敗而走又從子儀戰於清渠不利

舊唐書僕固懷恩傳

六月將軍王去榮擅殺富平令曲宥之

將軍王去榮以私怨殺本縣令當死上以其善用礮勅免死以白

衣於陝郡効力

通鑑

王去榮殺富平令杜徽肅宗惜去榮才詔貸死

至諫曰聖人誅亂必先示法令崇禮義將軍去榮以朔方偏裨提

數千士不能整行列挾私怨殺縣令有犯上之逆或曰去榮善守

陝新下非去榮不可守臣謂不然李光弼守太原程千里守上党



許叔冀守靈昌魯炁守南陽賈賁守雍丘張巡守睢陽初無去榮  
未聞賊能下也以一能而免死彼弧矢絕倫劍術無前者恃能犯  
上何以止之若捨去榮誅將來是法不一而招罪人也律令者太  
宗之律令陛下不可以一士小材廢祖宗大法帝詔群臣議太子  
太師韋見素文部郎中崔器等皆以爲法者天地大典王者不敢  
專也帝王不擅殺而小人得擅殺者是權過人主開元以前無敢  
專殺尊朝廷也今有之是弱國家也太宗定天下陛下復鴻業則  
去榮非至德罪人乃貞觀罪人也其罪祖宗所不赦陛下可易之

耶

唐書賈至傳

秋閏八月賊寇好時李光進敗之

閏八月甲寅安慶緒寇好時渭北節度使李光進敗之

唐書肅宗紀

賊寇鳳翔遣兵敗之司馬王伯倫戰沒



閏八月辛未賊將寇鳳翔崔光遠行軍司馬王伯倫叛官李椿率衆捍賊至中渭橋殺賊守橋衆千人追擊入苑中時賊大軍屯武功聞之燒營而去伯倫與賊血戰而死李椿力窮被執然自是賊不敢西侵

舊唐書  
肅宗紀

九月元帥廣平王俶率諸軍克復西京

至德二載九月以廣平郡王爲天下兵馬元帥率朔方安西回紇南蠻大食等兵二十萬以進討百官送於朝堂過闕而下步出木馬門然後復騎以安西北庭行營節度使李嗣業爲前軍朔方河西隴右行營節度使郭子儀爲中軍關內行營節度使王思禮爲後軍屯於香積寺敗賊將安守忠斬首六萬級賊將張通儒守長安聞守忠敗棄城走遂克京城乃留思禮屯於苑中代宗率大軍以東

唐書代宗紀

廣平王收長安嗣業統前軍陣於香積寺賊酋李歸



仁擁精騎薄戰王師注矢逐之走未及營賊大出掩追騎還蹂王師於是亂不能陣嗣業謂子儀曰今日不蹈萬死取一生則軍無類矣即袒持長刀大呼出陣前殺數十人陣復整步卒二千以陌刀長柯斧堵進所向無前歸仁匿兵覘左營軍勢王分回紇銳兵擊其伏嗣業出賊背合攻之是日中至昃斬首六萬餘級填澗壑死幾半賊東走遂平長安李嗣業傳郭子儀從元帥廣平王率蕃漢兵十五萬收長安李嗣業爲前軍元帥爲中軍子儀副之王思禮爲後軍陣香積寺之北距澧水臨大川彌亘一舍賊李歸仁領勁騎薄戰官軍囂嗣業以長刀突出斬賊數十騎乃定回紇以騎兵繚賊背夾攻之斬首六萬級生擒二萬賊帥張通儒夜亡陝郡翌日王入京師老幼夾道呼曰不圖今日復見官軍王休士三日遂東

郭子儀傳回紇請助討祿山以太子葉護身將四千騎來帝命廣平王



見葉護約爲昆弟葉護大喜使首領達干等先到扶風見子儀犒  
飲三日葉護辭曰國多難我助討逆何敢食固命乃留旣行日賜  
牛四十角羊八百蹄米四十斛香積之戰陣灋上賊詭伏騎於王  
師左襲我僕固懷恩回紇馳之盡剪其伏乃出賊背與鎮西北庭  
節度李嗣業夾度之賊大敗進收長安回紇傳  
兵馬副元帥郭子儀克華陰

子儀引蕃漢兵追賊至潼關斬首五千級克華陰郡獻俘百餘人  
勅皆斬之監察御史李勉諫曰今元惡未除爲賊所汙者半天下  
聞陛下龍興咸思洗心以承聖化今悉誅之是驅之使從賊也上  
遽使赦之通鑑

冬十月車駕入長安

九月癸卯收西京甲辰捷書至行在百僚稱賀即日告捷於



皇遣裴冕入京啓告郊廟社稷十月癸亥上自鳳翔還京遣太子太師韋見素入蜀迎上皇丙寅至望賢宮丁卯入長安士庶涕泣拜忭曰不圖復見吾君上亦爲之感惻九廟爲賊所焚上素服哭於廟三日入居大明宮是日上皇發蜀文武脅從官免冠徒跣朝堂待罪禁之府獄令中丞崔器劾之

舊唐書  
肅宗紀

十二月迎上皇至長安

上皇至自蜀上至望賢宮奉迎上皇御宮南樓上望樓辟易下馬趨進蹈舞稱慶上皇下樓上匍匐捧上皇足涕泗嗚咽不能自勝遂扶持上皇御殿親自進食自御馬以進上皇上馬又躬攬轡而行止之而後退上皇曰吾享國長久吾不知貴見吾子爲天子吾知貴矣上乘馬前導自開元門至丹鳳門旗幟燭天綵棚夾道士庶舞忭路側曰不圖今日再見二聖百僚班於含元殿上皇御殿



左相百辟稱賀畢上皇詣長樂殿詣九廟主即日幸興慶宮上請

歸東宮上皇遣高力士再三諭譬而止

舊唐書  
肅宗紀

上元元年春正月党項羗寇邊遣兵分討之

党項等羗吞噬邊鄙將逼京畿乃分邠寧爲鄜坊節度以邠州刺史桑如珪鄜州刺史杜冕領之分道招討而以郭子儀領兩道節度留京師假其威名以鎮之

綱目

夏六月鳳翔節度使崔光遠破党項於普閏

上元元年六月鳳翔節度崔光遠奏破涇州隴州等界羗渾党項等十餘萬衆又於普閏縣界破党項四千餘衆斬二千級生擒一百餘人收獲駝馬牛羊器械等不可勝數

冊府元龜

秋九月命郭子儀出鎮邠州党項遁走

或上言天下未平不宜置郭子儀於散地命出鎮邠州党項遁走



家傳

十二月党項掠美原同官

十二月丙子党項寇美原同官大掠而去

通鑑

二年春二月羗寇鳳州刺史蕭愷死之

二月己未奴刺党項羗寇寶鷄焚大散關寇鳳州刺史蕭愷死之

鳳翔尹李鼎敗之

唐書肅宗紀

寶應元年建卯月羗寇梁州

四月代宗即位

寶應元年建卯月羗渾奴刺寇梁州壬申鄜州刺史成公意及党

項戰敗之

唐書肅宗紀

建辰月奴刺寇梁州

建辰月甲午奴刺寇梁州

唐書肅宗紀

秋九月羗寇鳳州刺史擊破之



九月戊子鳳州刺史呂日將及党項羗戰於三絕谷敗之唐書代宗紀

代宗廣德元年春三月羗寇同州郭子儀敗之

三月甲子党項羗寇同州郭子儀敗之於黃堆山唐書代宗紀

秋七月吐蕃入大震散關

廣德元年七月吐蕃大寇河隴入大震關舊唐書代宗紀

冬十月吐蕃入寇京師詔郭子儀禦之車駕東幸

十月辛未吐蕃入京畿寇奉天武功盩厔等縣自司竹園渡渭循

南山而東舊唐書肅宗紀吐蕃陷涇州虜刺史高暉暉遂與蕃為鄉導引

賊深入京畿掠奉天武功濟渭而南緣山而東渭北行營兵馬使

呂日將逆戰於盩厔自辰至酉殺蕃軍數千然其徒多墮賊將逼

京師君上計無所出詔子儀為關內副元帥出鎮咸陽子儀自相

州不利李光弼代掌兵柄及徵還朝廷部曲散去及是承詔部下



惟二十騎強取民間蓄產以助軍至咸陽蕃軍已過渭水其日天子避狄幸陝州子儀聞上避狄雪涕還京至則車駕已發射生將王獻忠從駕沿路遂以四百騎叛仍逼豐王以下十王欲投於賊子儀入開遠門遇之詰豐王等所向遂援送行在郭子儀傳吐蕃入長安副元帥郭子儀擊走之長安平

子儀退趨商州高暉導虜入長安立廣武王承宏爲帝改元擅作赦令署官吏衣冠皆南奔荆襄或逋棲山谷亂兵因相攘鈔道路梗閉光祿卿殷仲卿率千人壁藍田選二百騎度漶或給虜曰郭令公軍且來吐蕃大震會少將王甫與惡少年伐鼓譟苑中虜驚夜引去子儀入長安高暉東奔至潼關守將李日越殺之吐蕃留京師十五日乃走唐書吐蕃傳子儀遣六軍兵馬使張知節烏崇福羽

林軍使長孫全緒等將兵萬人爲前鋒營於韓公堆盛張旗幟鼓



鞞震山谷全緒遣禁軍舊將王甫入長安陰結少年豪俠以為內  
應一日齊擊鼓於朱雀街蕃軍惶駭而去大將李忠義先屯兵苑  
中渭北節度使王仲升守朝堂子儀以大軍續進至滄西射生將  
王撫自署為京兆尹聚兵二千人擾亂京城子儀殺之詔子儀權  
京城留守舊唐書郭子儀傳廊延節度判官段秀實說節度使白孝德引  
兵赴難孝德即日大舉南趣京畿與蒲陝商華合勢進擊通鑑  
吐蕃寇鳳翔鎮西節度使馬璘敗之

吐蕃寇邊詔璘移軍援河西懷恩之叛璘引還間關轉鬪至鳳翔  
虜圍已合節度孫志直嬰城守璘令士持滿外向突入縣門不解  
甲出戰背城陣虜潰率輕騎追之斬數千級漂血丹渠唐書馬璘傳

冬十二月車駕入京師

十二月甲午至自陝州

唐書代宗紀

子儀為京城留守程元振說



洛陽帝可其計子儀奏曰雍州古稱天府右隴蜀左嶠岷襟憑終南太華之險背負清渭濁河之固地方數千里帶甲十餘萬兵強士勇真用武之國秦漢所以成帝業也後或處而泰去而亡者不一姓故高祖先入關定天下先帝興朔方誅慶緒陛下席西土戮朝義雖天道助順亦地勢則然比吐蕃憑陵而不能抗者臣能言其畧夫六軍皆市井人竄虛名逃實賦一旦驅以就戰有百奔無一前又宦豎掩逃庶政荒奪遂令陛下徬徨暴露越在陝服斯委任失人豈秦地非良哉今咸謂且都洛陽洛陽自大盜以來焚埃畧盡百曹榛荒褰服不滿千戶井邑如墟豺狼群嘯千里蕭條亭舍不烟何以奉萬乘牲餼供百官次舍哉且地狹阨裁數百里險不足防適爲鬪場陛下意者不以京畿新罹剝蹂國用不足乎臣願陛下斥素餐去冗食抑閹寺任直臣薄征弛役卹隱撫鰥寡宰



相以簡賢任能付臣以訓兵禦侮則中興之功日月可冀惟時邁  
亟還見宗廟謁園陵再造王家以幸天下帝得奏泣謂左右曰子  
儀固社稷臣也朕西決矣乘輿還子儀頓首請罪帝勞曰用卿晚  
故至此乃賜鐵券圖形凌煙閣唐書郭子儀傳  
築城於鄠

築城於鄠縣及中渭橋屯兵以備吐蕃以駱奉先爲鄠縣築城使

遂將其兵

通鑑

放廣武王承宏於華州

代宗廣德元年十月吐蕃盜入長安邠王守禮之孫廣武王承  
竊尊號及京城平鑾輿自陝州還京師十二月丙申放廣武王承

宏於華州一切不問

冊府元龜○按唐書宗室傳世系表俱云承宏係邠王守禮子此云孫者疑誤

二年春三月羗寇同州郭子儀遣將擊破之



党項羗寇同州郭子儀使關府儀同三司李國臣擊之曰虜得聞則出掠官軍至則逃入山宜使羸師居前以誘之勁騎居後以覆之國臣與戰於澄城北大破之斬首捕虜千餘人

通鑑

秋八月僕固懷恩引回紇吐蕃入寇詔郭子儀出鎮奉天

懷恩誘吐蕃回紇党項數十萬入寇朝廷大恐詔郭子儀屯奉天帝問計所出對曰無能爲也懷恩本臣偏將雖慄果然素失士心今能爲亂者誅思歸之士刳與俱來且皆臣故部曲素以恩信結之彼忍以刃相向乎帝曰善

唐書郭子儀傳

吐蕃寇邠州節度使白孝德敗之

懷恩誘吐蕃進掠涇邠祭來墳墓渡涇水邠寧節度使白孝德禦之覆其陣懷恩泣曰曩者皆爲我子反爲人致死於我

唐書懷恩傳

冬十月吐蕃寇奉天郭子儀禦之遁去



十月丙寅吐蕃寇邠州丁卯寇奉天京師戒嚴唐書代宗紀虜寇邠州

先驅至奉天諸將請擊之子儀曰客深入利速戰彼下素德我吾

緩之當自携貳因下令敢言戰者斬堅壁待之賊果遁去唐書郭子儀傳

朔方兵馬使郭晞擊吐蕃於邠西敗之

十月辛未夜郭晞遣馬步三千人於邠州西斬賊營殺千餘人

擒八十三人俘大將四人十一月乙未懷恩及吐蕃等自潰實錄賊

至邠州營於北原攻其東門不尅橫陣於南原請戰晞等與之連

戰大破之追奔數十里涉涇而還汾陽家傳時郭子儀爲副元帥在蒲

子晞以檢校尚書領行營節度使屯邠州士放縱不法孝德不敢

劾秀實以狀白孝德請爲都虞侯俄而晞士十七人入市取酒刺

酒翁壞釀器秀實列卒取之斲首置槊上植市門外一營大譟

申孝德恐召秀實曰奈何秀實曰請辭於軍乃解佩刀選老嫗一



人持馬至晞門下甲者出秀實笑且入曰殺一老卒何甲也吾戴  
吾頭來甲者愕眙因曉之曰尚書固負若屬耶副元帥固負若屬  
耶奈何欲以亂敗郭氏晞出秀實曰副元帥功塞天地當務始終  
今尚書恣卒爲暴使亂天子邊罪且及副元帥郭氏功名其與存  
者有幾晞再拜曰公幸教晞願奉軍以從即叱左右皆解甲令曰  
敢謹者死秀實宿軍中且與俱至孝德所謝

唐書段  
秀實傳

十一月節度使李抱玉討南山五谷賊平之

廣德中吐蕃入寇帝次陝群盜徧南山五谷間東拒虢西抵岐椎  
剽不勝計詔太子賓客謝景仙爲南山五溪谷防禦使引兵招捕  
久不克更詔抱玉討賊抱玉盡得賊株柢遂分兵守諸谷使牙將  
李崇客精騎四百襲之賊帥高玉脫身走城固山南西道張獻誠  
擒以獻悉索支黨斬之不閱旬五谷平

唐書李  
抱玉傳



永泰元年春二月羗寇富平

二月戊寅党項羗寇富平焚定陵寢殿

舊唐書代宗紀

三月遣兵戍奉天

吐蕃遣使請和詔元載杜鴻漸與盟於興唐寺

會要云興唐寺在大寧坊太平公主

為天

后立上問郭子儀吐蕃請盟何如對曰吐蕃乘我不虞而來國不

可守矣乃相繼遣河中兵戍奉天

通鑑

秋九月回紇吐蕃雜虜入寇召郭子儀屯涇陽

九月甲辰吐蕃寇醴泉奉天党項羗寇同州渾奴刺寇盤屋京師

戒嚴已酉屯於苑郭子儀屯於涇陽丁巳同華節度使周智光及

吐蕃戰於澄城敗之

唐書代宗紀

懷恩說吐蕃回紇党項羗渾奴等

三十萬掠涇邠蹂鳳翔入醴泉奉天京師大震於是帝命李忠臣

屯東渭橋李光進屯雲陽馬璘郝廷玉屯便橋李抱玉屯鳳翔周



智光屯同州杜冕坊州天子自將屯苑中急召子儀屯涇陽

郭子

儀傳

冬十月回紇及郭子儀盟於涇陽而還吐蕃遁去

十月己未吐蕃至邠州與回紇寇邊辛酉寇奉天癸亥寇同州乙

丑寇興平丁卯回紇党項羗請降

唐書代宗紀

子儀屯涇陽軍纔萬人

虜騎圍已合乃使李國臣高昇魏楚玉陳迴光朱元琮各當一面

身自率鎧騎二千出入陣中回紇怪問是爲誰報曰郭令公驚曰

郭令公存乎懷恩言天可汗棄天下令公即世中國無主故我從

以來公今存天可汗存乎曰天子萬壽回紇悟曰彼欺我乎子儀

使諭虜曰昔回紇涉萬里戡大憝助復二京我與若等休戚同之

今乃棄舊好助叛臣一何愚彼背主棄親於回紇何有回紇曰本

謂公云亡不然何以至此今誠存我得見乎子儀將出左右諫戎



狄野心不可信子儀曰虜衆數十倍今力不敵吾將示以至誠左右請以五百騎從又不聽即傳呼曰令公來虜皆持滿待子儀以數十騎出免胄見其大酋曰諸君同艱難久矣何忽亡忠義而至是邪回紇捨兵下馬拜曰果吾父也子儀即召與飲遺錦綵結歡誓好如初因曰吐蕃本吾舅甥國無負而來棄親也馬牛被數百里公等若倒戈乘之若俛取一芥是謂天賜不可失且逐戎得利與我繼好不兩善乎會懷恩暴死無所統一遂許諾吐蕃疑之夜

引去

唐書郭子儀傳

回紇首領羅達子等率其衆二千餘騎詣涇陽請降

子儀許之合胡祿都督等與宰相磨咄莫賀達于宰相噉莫賀達于宰相護都毗伽將軍宰相揭拉裴羅達于宰相梅錄大將軍羅達于平章事海寧闢達于等子儀先執杯合胡祿都督請咒子儀咒曰大唐天子萬萬歲回紇可汗亦萬萬歲若起負心背盟約者



身死陣前家口屠戮合胡祿都督等失色及杯至即譯曰如令公

盟約皆喜曰初發本部將巫師兩人來云此行見一大人即歸巫

師信有徵矣

舊唐書  
回紇傳

郝廷玉累封安邊郡王授神策將軍時吐蕃

犯京畿與馬璘屯中渭橋魚朝恩聞其善布陣請觀之廷玉申號

令鳴鼓角部伍坐作進退若一朝恩歎曰吾處兵間久今始識訓

練法廷玉惻然曰此臨淮王遺法也

郝廷  
玉傳

大曆元年冬十二月同華節度使周智光反

智光遷同華二州節度使聚不逞數萬恣剽掠以甘其欲結固之

殺陝州監軍張志斌及前虢州刺史龐克時崔圓自淮南納方物

百萬盜頡其半天下貢奉輸漕刦留之士沿調當西間道走同者

遣部將邀捕斬之代宗未暴其罪命中使余元仙持詔拜尚書左

僕射既授詔恚語曰吾有大功上不與平章事且同華地狹不足



伸足若加陝號商鄜坊五州差可元仙震汗徐遺百縑遣之

唐書周智

光傳

二年春正月郭子儀討周智光斬之

二年上詔郭子儀密圖之同華路閉詔書不能通乃詔子儀婿趙縱受口詔書帛內密丸遣家僮走間道傳詔子儀得詔聲言討之未行其衆大携部將李漢惠自同州降子儀乃貶智光澧州刺史聽百人隨身貸將吏一切不問尋爲帳下斬其首并斬子元耀元幹來獻詔梟首皇城南街判官邵賁別將蔣羅漢並伏誅

唐書周智光傳

華州牙將姚懷李延俊殺智光

通鑑

淮西節度使李忠臣掠華州

淮西李忠臣入朝次潼關聞智光反率兵討之會敗忠臣因入華大掠自赤水至潼關畜產財物皆盡官吏至衣紙自蔽累日不食



者唐書周智光傳

二月帝如昆明池

大曆二年二月壬午幸昆明池從俗踏青也

冊府元龜

秋七月作章敬寺

魚朝恩奏以先所賜莊爲章敬寺以資章敬太后冥福窮壯極麗毀曲江及華清宮館以給之費逾萬億衛州進士高郢上書曰先太后聖德不必以一寺增輝國家永圖無寧以百姓爲本捨人就寺何福之爲又曰古之明王積善以致福不費財以求福修德以消禍不勞人以穰禍今徇左右之過計傷皇上之大猷臣竊爲陛下惜之不報

通鑑

秋九月吐蕃入寇詔郭子儀鎮涇陽

吐蕃寇邠州詔子儀率師三萬自河中鎮涇陽京師戒嚴戊午移



鎮奉天

舊唐書  
代宗紀

三年春正月帝如章敬寺

上幸章敬寺度僧尼千人

通鑑

二月商州兵馬使劉洽作亂

二月癸巳商州兵馬使劉洽殺其刺史殷仲卿

唐書代  
宗紀

秋八月吐蕃寇邠節度使馬璘敗之

八月丁卯吐蕃寇邠州京師戒嚴節度使馬璘破吐蕃二萬於邠

州

舊唐書  
代宗紀

冬十二月邠州兵馬使王童之謀作亂知留後段秀實捕斬之

元載以吐蕃連歲入寇議徙馬璘鎮涇州而使郭子儀以朔方兵

鎮邠州璘先往城涇州以都虞侯段秀實知邠州留後初四鎮北

庭兵久羈旅數遷徙頗積勞弊及徙涇州衆皆怨誹刀斧兵馬



王童之謀作亂期以辛酉旦警嚴而發有告之者秀實陽召掌漏者怒之以其失節令每更來白輒延之數刻遂四更而曙童之不果發秀實欲討之而亂迹未露又云今夕欲焚馬坊草因救火謀作亂中夕火起秀實命軍中行者皆止坐者勿起各整部伍嚴守要害童之白請救火不許及旦捕童之及其黨八人皆斬之下令曰後徙者族流言者刑遂徙於涇

通鑑

五年二月鳳翔軍亂

二月戊戌李抱玉移鎮盤屋軍士忿怒大掠鳳翔坊市數日乃定

通鑑

七年春正月回紇使者犯朱雀門

回紇使出鴻臚寺剗掠坊市吏不能禁止復以三百騎犯金光朱雀等門是日皇城諸門皆閉遣諭之乃止

舊唐書  
代宗紀



八年冬十月兵馬使渾瑊及吐蕃戰於宜祿敗績

十月西戎寇邠涇原節度使馬公襲之郭公使其將渾瑊率步騎五千爲之犄角十八日師登黃蘗原望見吐蕃瑊急引其衆前據乘險仍設拒馬槍以遏馳突之勢史抗溫儒雅等宿將五六人任氣自負輕侮督將置酒高飲使人召之至則皆醉矣見拒馬槍曰野地見賊須擊設此何爲命去之戎衆旣陳抗等叱馬軍使馳賊及回自衝其軍吐蕃攝背而入我師大敗卒之不死者什二三

九年春二月遣兵戍朔方

二月郭子儀入朝言朔方國之北門戰士耗散存者什纔有一今吐蕃兼河隴之地雜羗渾之衆勢彊十倍願更於諸道各發精卒戍兵四五萬人則可以制勝矣

通鑑

十年秋九月吐蕃寇隴州李抱玉敗之



九月癸丑吐蕃寇隴州鳳翔節度使李抱玉擊退之

舊唐書代宗紀

冬十二月回紇寇夏州梁榮宗敗之

回紇千

冠夏州州將梁榮宗破之於烏水

烏水在夏州朔方縣

郭子儀遣

兵三千救夏州回紇遁去

通鑑

十一年春二月詔加邊城防戍

二月增朔方五城戍兵以備回紇

通鑑

十二年夏五月金州卓英璘叛刺史孫道平擒殺之

載委主書卓英倩關通貨賄大曆十二年詔收載賜死英倩弟英

璘家金州州人緣以授官者亦百餘聚無賴少年以伺變載誅璘

盜庫兵據險以叛詔發禁兵及山南西道兵二千討捕刺史孫道

平擒殺之詔給其州三年

唐書元載傳

秋九月吐蕃寇坊州



九月庚午吐蕃寇坊州掠党項羊馬而去

舊唐書代宗紀

吐蕃寇坊州又

寇鹽夏州又寇長城郭子儀遣兵拒却之

通鑑

十三年秋八月吐蕃寇銀麟州郭子儀遣兵敗之

吐蕃二萬寇銀麟州畧党項雜畜郭子儀遣李懷光擊破之

通鑑

冬十二月邠州兵馬使李懷光謀作亂知留務杜黃裳矯定之

杜黃裳郭子儀辟佐朔方府子儀入朝使主留事李懷光與監軍

陰謀矯詔誅大將等以動衆心欲代子儀黃裳得詔判其非以質

懷光懷光伏罪於是諸將狠驕難制者黃裳皆以子儀令易置衆

不敢亂

唐書杜黃裳傳



